

新刊

周禮全經

十一



周禮全經卷之十一

秋官上

大司寇之職掌建邦之三典以佐王刑邦國詰四方
一曰刑新國用輕典二曰刑平國用中典三曰刑亂

國用重典

詰起吉反

釋曰典常也法也民失其常則立灋以治之使復
于常乃謂之典也苟失其常諸侯則治之以三典
萬民則治之以五刑皆欲致之於中和也詰究治
也新國者新造之國其民未習於教故用輕典寬
其文法洪範所謂柔克也平國者已治之國其民

已服其政故用中典不剛不柔洪範所謂正直也
亂國者悖亂之國其民頑梗暴疾故用重典嚴其
政刑明其誅罰洪範所謂剛克也夫先王以德制
刑以刑輔德凡刑之所施如權衡之懸低昂隨物
何嘗容心哉

何氏曰三典以明刑猶三德以爲治也然人君撫
世酬物又不可執一焉新國固用輕典也不幸承
刑政縱弛之後人有慢心若復以輕典治之是以
水濟水矣必時出猛政懾服人心如諸葛亮之治
蜀可也亂國固宜重典也不幸承殘虐無道之餘

人無生意若復以重典治之是如火益熱矣必除
其苛政使人知有生之樂如裴度之入蔡可也平
國固宜用中典也然法度不脩姑息爲治則國勢
寢微矣必脩明灋度振舉紀綱使臣民皆有所警
懼子孫有所持循可也有天下國家者其可不審
於所用哉

以五刑糾萬民一曰野刑上功糾力二曰軍刑上命
糾守三曰鄉刑上德糾孝四曰官刑上能糾職五曰
國刑上愿糾暴

釋曰五刑以野軍鄉官國爲序先遠而後近也上

者必欲致其如此也。糾者察其違於此，然後刑之也。故不先教之，曷以刑之？野刑施於田野，野以農功爲上，而察其不致力者則刑之；軍刑施於軍旅者，兵以用命爲上，而察其不守律者則刑之；鄉刑施於鄉，灋之教以成德爲上，而察其不致孝者則刑之；孝爲百行之本也。官刑施於官府者，官以賢能爲上，而察其不脩職者則刑之；國刑施於王國者，以謹愿爲上，而察其強暴者則刑之；暴愿之反也。野刑如載師閭師不耕出屋粟，無職出夫布之類；軍刑不用命者戮于社之類；鄉刑八刑糾萬民之類；官刑即士師之八成，國刑即小宰以官刑憲禁于王宮是也。古之刑師以五者爲類，必欲遵行之灋，列之於先，然後糾其不如灋而刑之。禮刑表稟之義也。

劉氏曰：以五刑糾萬民者，建六典以爲民極也。是故六卿分職，各職於其官，而建之使必行於天下。範於後世者，司寇之刑典也。乃建事典，佐王富邦國，任百官，生萬民者，用野刑焉。農耕也，溝涂也，隄防也，井邑也，宮城也，百工也，凡役民以作其事者，以成工爲上，不致力爲糾也。則冬官之政待之而

後立焉乃建政典佐王平邦國正百官均萬民者則用軍刑焉振旅也菱舍也大閱也伐國也戍疆也凡設民立政以尊國家者用命爲上以不死守爲糾也則夏官之政待之而後成焉乃建教典佐王安邦國教官府擾萬民者用鄉刑焉司徒以鄉八刑糾萬民是也六德也六行也六藝也五禮也凡率民以行其教而佐邦國者以成德爲上以不致孝爲糾也則地官之職待之而後立焉乃建治典以佐王經邦國治官府經萬民者用官刑焉六官也六屬也府史也群吏也凡役民以立其治造

國家者以賢能爲上以不稱職爲糾也則天官之職待之而後立焉凡建禮典佐王以和邦國統百官諧萬民者用國刑焉君臣也父子也兄弟也夫婦也朋友也祭祀也凡率民以踐其禮者以恪愿爲上以不致恭爲糾也則春官之職待之而後立焉五者國之大典聖人皇建其極於天下以參天地而贊化育待之而成焉然非典刑之正亦莫得而成之也不曰詰邦國刑百官糾萬民乎

以圜土聚教罷民凡害人者寘之圜土而施職事焉以明刑耻之其能改者反于中國不齒三年其不能

改而出圜土者殺

罷音疲

釋曰圜土獄城也聚罷民其中困苦以教之爲善也民不愆作勞有似於罷害人謂邪惡已有過失麗於法者以其不故犯罪寘之圜土繫教之庶其困悔而知改也寘置也施職事以所能役使之明刑書其罪惡於大方版著於背以耻之所以啓其憤而思悔過遷善也其能改者俾反乎鄉里而猶不得齒於平民者三年欲其動心忍性深自懲慙也司圜職曰上罪三年而舍中罪二年而舍下罪一年而舍出謂逃亡也既不能改過又遁出乎獄城則寘之極刑蓋法有出圜土者殺之例也夫聚而教之者仁出而殺之者義圜土之設而先王之仁義兩存則孰不遠罪遷善哉

李氏曰人之爲惡豈一朝一夕必有漸也放僻邪侈之情動而無所顧忌則或伏刃市朝或流血刀踞雖其悔之猶噬臍也是故先王之馭民必早爲之所過輕者則坐諸嘉石稍重者則歸于圜土皆未入于五刑也若因茲困辱遂能自新則復爲齊民何刑殺之及哉此亦使民遷善遠罪之灋也孔子曰小人不耻不仁不畏不義不見利不勸不威

不懲小懲而大誠此小人之福也易曰履校滅趾無咎此之謂也

以兩造禁民訟入束矢於朝然後聽之

造七報反

釋曰鄭氏曰訟謂以財貨相造者造至也使訟者兩至既兩至使入束矢乃治之也不至不入束矢則是自服不直者也詩曰其直如矢古者一弓百矢束矢其百矢歟王氏曰兩造謂彼已有辨兩爭者皆至於公也訟者言於公也以兩造聽之而無所偏受則不直者自反而民訟自禁矣入束矢以明其直不直則入其矢所以懲不直不直知懲則

訟何患於滋乎古之於訟謂之聽者以聽其聲為主也書曰兩造具備師聽五辭是也

以兩劑禁民獄入鈞金三日乃致于朝然後聽之

釋曰鄭氏曰獄謂相告以罪名者劑今券書也使獄者各齎券書既兩券書使入鈞金又三日乃治之重刑也不券書不入金亦自服不直也必入金者取其堅也三十斤曰鈞王氏曰方言於公者訟也以罪相告者獄也蓋爭而不已必至於訟訟而不已必至於獄以其至於獄也必有簡然後聽之簡劑之類也劑判書也兩劑各具獄辭之書也以

兩劑聽之則無所偏信而不直者自反而民獄自禁矣入鈞金以自明其不可變然後聽之必三日而後辯者重致民於獄也書曰聽獄之兩辭記曰有旨無簡不聽是也

以嘉石平罷民允萬民之有罪過而未麗於灋而害於州里者桎梏而坐諸嘉石役諸司空重罪旬有三日坐暮役其次九日坐九月役其次七日坐七月役其次五日坐五月役其下罪三日坐三月役使州里任之則宥而舍之

桎音質梏古毒反

釋曰嘉石文石也立之外朝門左平威也成之使

之善也嘉石有文欲使罷民思其文理而改悔自脩也麗附也未附於灋未著於灋也木在足曰桎在手曰梏役諸司空坐日訖使給百工之役也王介甫曰萬民之有罪過而未麗於灋而害於州里者則司救所謂衰惡也凡害人者司救所謂過失也過失不謂之罪而得罪反重於衰惡則為其已麗於灋也唯其過失是以未入於刑不虧其體以圜土教之也衰惡謂之罪而得罪反輕於過失為其未麗於灋也坐諸嘉石使自反焉且以耻之役諸司空則以強其罷故也州里任之則宥而舍之

無任者不舎焉是乃使州里相安也先王善是法以爲刑人也不虧體罰人也不虧財司空之役不可廢也與其徭平而苦之孰若役此以安州里之爲利也

以肺石達窮民凡遠近惇獨老幼之欲有復於上而其長弗達者立於肺石三日士聽其辭以告於上而罪其長

釋曰肺石赤石也窮民夫民之窮而無告者無兄弟曰惇無子孫曰獨復猶報也長謂諸侯若鄉遂大夫長不肯通達窮民立於肺石三日然後聽之

以觀其誠又恐其瀆也劉氏曰肺者氣之腑而外達乎皮毛惇獨老幼天民之窮無告也猶國之皮毛心之氣靡而不通也不通則疾病生焉故用之達窮民其有取於是乎立於肺石三日者審究考核得其情實然後以其辭告於上而罪其長焉正月之吉始和布刑于邦國都鄙乃縣刑象之灋于象魏使萬民觀刑象挾日而歛之

釋曰布刑者正歲布之正月始縣之也蓋先王制刑欲使易避而難犯苟不顯示乎民而愚者或陷於罪從而刑之是罔民也必使民觀之者亦使其

周禮全經 卷之十一
知所避而已夫刑例也例者成也宜無加損焉必於正月布行之者蓋先王雖原情以定罪因事以制刑亦當因時而爲之變通是故每年有灋度之頒焉者也

凡邦之大盟約泣其盟書而登之于天府太史內史司會及六官皆受其貳而藏之

釋曰大盟約者謂王與諸侯因大會同而與盟所有約誓之辭泣臨也天府祖廟之藏六官六卿之官貳副也夫刑一成而不可變盟要如之且違焉則刑之取也故司寇泣其盟書太史掌邦之典灋

則內史掌國灋國令之貳司會掌典灋則之貳皆貳而藏之各以其事攷焉非特徭失亡而已也凡諸侯之獄訟以邦典定之凡卿大夫之獄訟以邦灋斷之凡庶民之獄訟以邦成蔽之

釋曰邦典三典也有新國平國亂國之差而輕重之邦灋八辟之灋有議親議故議賢議能至議宿之辟此爲卿大夫而設也邦成士師之八成邦汙邦賊至邦朋邦誣雖爲士而設兼乎庶民也三典大司寇掌之八灋小司寇掌之八成士師掌之尊卑之序也豈六典八灋官成之謂哉

大祭祀奉犬牲若禋祀五帝則戒之日涖誓百官戒于百族及納亨前王祭之日亦如之奉其明水火凡朝覲會同前王大喪亦如之大軍旅涖戮于社凡邦之大事使其屬蹕

亨音庚反

釋曰犬金畜也秋官羞之各從其類也戒之日卜之日也百官者百執事也百族者主之族姓也族姓之與於祭則重於百官矣故戒百官於庫門之內而戒百族於太廟之內所以辨親疎也百官言誓而百族言戒者百族不預於執事有預於從祭所以不聽誓而聽戒也納亨致牲也大司寇為王

引導祭之日亦然明水火取於日月者水以配鬱鬯與五齊火以給饗亨也凡朝覲會同之時行禮為主前導大喪亦然王氏曰明水火之為物潔而陰陽之精氣也所以致聖人精明之意於鬼神示也而刑官奉之以其自潔而能潔於神也弗用命戮于社軍法也司寇涖戮刑官之事也屬士師以下蹕止行人也劉氏曰邦之大事從民衆矣所以致肅也使刑官之屬蹕之則罔不肅矣商書也國危二曰詢國遷三曰詢立君其位王南鄉三公及

州長百姓北面羣臣西面羣吏東面小司寇擯以叙
進而問焉以衆輔志而弊謀鄉許亮反
長丁丈反

釋曰外朝在雉門外致萬民聚集之也詢謀也國
有大政心有疑則臨外朝集各羣臣萬民而咨
謀焉國危謂兵寇交至詢所以輯寧之策也國遷
謂都邑不安詢以遷徙之宜也立君謂國無冢嫡
詢以孰可為宗社之主也羣臣卿大夫士也羣吏
府史也當咨謀之時天子南鄉三公州長北面帥
民也百姓北面答君也不言三孤從公而立也群
臣在東而西面群吏在西而東面左右其事而已

王氏曰三公鄉老也上言三公中言州長下言百
姓則鄉官俱在矣詢者詢之民也擯謂揖之使前
也叙次也志在王也謀在下也以衆輔志則以衆
謀而輔王之志也弊謀則以衆謀為稽而斷之於
王也書所謂朕志先定詢謀僉同亦若此而已矣
以五刑聽萬民之獄訟附于刑用情訊之至于旬乃
蔽之讀書則用灋凡命夫命婦不躬坐獄訟凡王之
同族有罪不即市訊音信

釋曰五刑墨劓宮剕殺也聽獄訟則是非曲直能
審克也能聽之然後於有罪者而麗之於法以附

于刑也既得其罪附于刑矣又從而用情理以訊之莫其有可以出之者或非其心服而從者至於十日乃斷之王制曰例者成也一成而不可變故君子盡心焉又以罪斷之書讀之於囚使知其所犯審之而弗變乃用法焉則受刑者可無憾矣其謹之如是也凡命夫命婦不躬坐獄訟者爲治獄吏褻尊者也不身坐者必使其子弟代之所以養其信義也人有信義則廉耻生於其心而不復爲非義也此先王所以厚風俗正人倫也王族有罪不即市磬于甸人不與國人慮兄弟也王氏曰命

夫婦不躬坐獄者貴貴也王同族有罪不即市者親親也貴貴親親仁之至義之盡也

以五聲聽獄訟求民情一曰辭聽二曰色聽三曰氣聽四曰耳聽五曰目聽

釋曰聽獄訟求民情以訊鞠作其言因察其視聽氣色以知其情僞故皆謂之聲焉辭聽謂觀其出言不直則煩色聽謂觀其顏色不直則赧然氣聽謂觀其氣息不直則喘耳聽謂觀聆不直則惑目聽謂觀其眸子不直則眊然然皆以辭爲主辭窮而情得矣故五聲以辭爲先色氣耳目次之

以八辟麗邦灋附刑罰一曰議親之辟二曰議故之辟三曰議賢之辟四曰議能之辟五曰議功之辟六曰議貴之辟七曰議勤之辟八曰議賓之辟

釋曰辟灋也附麗也人之犯灋有親貴勛賢之屬則議其輕重以爲辟宥焉蓋卿大夫之屬也親王之親戚也故王之故知也必王之親故則不可以衆人同例賢有德者能有才者以國之賢能則不可與庸常同科功謂勛在社稷貴謂官居親近有功則或可掩過在貴則不遽辱勤則盡瘁國事者賓謂作賓王家吏之勤勞可圖後效既備三條則

待以不臣此八者不幸陷於刑罪必上請而議之不可遽行刑灋也乃理之當然豈撓灋哉

以三刺斷庶民獄訟之中一曰訊羣臣二曰訊羣吏三曰訊萬民聽民之所刺宥以施上服下服之刑

釋曰刺殺也謂獄成而殺之者猶懼其殺之失中也
是以訊問於衆以蔽之訊之於羣臣羣吏庶民皆知其情之可以刺宥然後從而施其刑所謂國人皆曰可殺然後殺之者也其刑或上服或下服不失乎中焉上服則刑之重者下服則刑之輕者上服下服猶舜典言五刑有服呂刑言上刑適輕

下服下刑適重上服同也

李氏曰凡有血氣之類莫不愛其生君大夫士之於牛羊豕猶無故不殺况於人為萬物之靈父母生之拊畜長育顧復之恩至三年然後免於其懷刑之大者伏鉄鎖其次亦斷支體刻飢膚終身不息何其痛哉刑期無刑蓋不獲已苟得其情亦哀矜勿喜矧可不審以及于非辜者乎故聖人求之以五聽麗之以八議三宥以恤其非意三赦以異於全人猶恐聰有所不聞明有所不見下情有所不達議法有所不平於是外朝之法以詢于衆

焉必群臣群吏萬民之意同然後刑殺可不謂謹乎此孟子所謂國人皆曰可殺然後殺之意也

及大比登民數自生齒以上登于天府內史司會冢

宰貳之以制國用

上時掌反

釋曰大比三年大校比而計其民數之衆寡也人生齒而體備男八月女七月而生齒皆書之于版而登于天府也人數定則賦歛可知國用乃可制耳蓋國用以賦歛制之賦歛之多寡以民數制之故也冢宰制國用而兼內史司會言之者內史執國令之貳以逆會計司會以法均節邦之財用故

也

小祭祀奉犬牲凡禋祀五帝實鑊水納亨亦如之大賓客前王而辟后世子之喪亦如之小師泣戮凡國之大事使其屬蹕孟冬祀司民獻民數於玉王拜受之以圖國用而進退之

釋曰實鑊所以滌牲也納亨所以煮牲也前王而辟為王開道除奸凶也小師王不自出之師屬亦士師以下也司民星名謂軒轅角也進退猶損益也國用民衆則益民寡則損益每夫有三征故即民數可知國用也王氏曰民生自天天實有司之

者先王必有以報其生養之功冬成物之時故孟冬祀司民焉方祀司民則司寇獻民數於王者以民之多寡實天降也刑之繁省致天討也王拜而受之重國本也圖制國用於司寇言之者民之輕生而觸法冒死而犯刑者以其貧而已民之貧以不知圖國用而制之故也

歲終則令羣士計獄弊訟登中于天府正歲帥其屬而觀刑象令以木鐸曰不用灋者國有常刑令羣士乃宣布于四方憲刑禁乃命其屬入會乃致事

釋曰羣士刑官也登中上其所斷之獄訟事實之

書必於天府者以刑所以致天討且示重其書而用刑不敢不謹也令群士則令于士師鄉士以下使之稟灋故也宣布于四方邦國都鄙也憲刑禁則揭而示之使知所避也有刑必有禁所以左右刑罰而使不犯也命其屬刑官之屬也入會則計其刑之多少而入其書於司寇也歲會餘官皆以歲終入其書司寇獨以正歲入之者所以謹其始也且重民命也乃致事得其屬之計乃令致之於王也同月計之於司寇同月計之於王士師之職掌國之五禁之灋以左右刑罰一曰宮禁

二曰官禁三曰國禁四曰野禁五曰軍禁皆以木鐸

徇之于朝書而縣于門閭

左音佐徇以後反

釋曰先王之用刑罰常出於不得已其心常期於

不用也故必輔之以禁欲民無犯於刑是右助刑

灋毋使罪麗於民也宮禁王宮官府國則王城之

內野則郊野之中軍則行師之際此五禁者徇以

木鐸使人共聞縣於門閭使人共見也古之禁書

不可見亦因時制之要在於使民無犯而已

以五戒先後刑罰毋使罪麗于民一曰誓用之于軍

旅二曰誥用之于會同三曰禁用諸田役四曰糾用

諸國中五曰憲用諸都鄙

釋曰禁者止使勿爲施於未然之前戒者飲其怠忽施於事爲之際以五戒先之則引而道之使民無進而麗於五罰也以五戒後之使民無退而麗於五刑也誓若湯誓秦誓之類誥若康誥洛誥之類禁若遂人之田役掌其禁令糾若刑典之糾萬民憲若布憲掌憲邦之刑禁是也然誓者約束以灋非特軍旅也祭祀誓戒亦誓也誥者開諭以理非特會同太祝有誥誥於廟之類禁非特田役官禁官府皆有禁也推之則糾也憲也亦若是而已

掌鄉合州黨族閭比之聯與其民人之什伍使之相安相受以比追胥之事以施刑罰慶賞

釋曰閭胥職曰四閭爲族八閭爲聯五人爲伍十人爲聯蓋閭比卒伍之灋渙然而散則同等者各不相上下惟以聯灋施之則先後大小各當其分而無相凌之患矣合者合其州黨族閭比之聯聯其居合卒伍之聯聯其人也夫聯比其居什伍其人鄉官之事也而士師掌其合之法所以使之相安相受故也上下有序故相安先後有倫故相安無事而相安相受然後有事而可以同其憂患焉

此追胥逐寇伺盜之事於是乎可作矣廢事者施
 刑罰有功者施慶賞所以聯比之者欲其慶賞刑
 罰相及而已士師掌刑罰故掌合鄉之政如此云
 掌官中之政令察獄訟之辭以詔司寇斷獄弊訟致
 邦令

釋曰官中政令刑官之中政事教令士師掌之以
 士師刑官之攷也察獄訟之辭群士上其獄訟不
 決之事致於士師士師察其辭之曲直以告司寇
 斷之弊之焉獄訟既審合於邦令則以法報於群
 士也

掌士之八成一曰邦汙二曰邦賊三曰邦謀四曰犯
 邦令五曰橋邦令六曰為邦盜七曰為邦朋八曰為
 邦誣

汙止約反
橋音矯

釋曰八成言士者以此刑皆治為士者之成法也
 大司寇曰凡庶民之獄訟以邦成弊之即此八成
 也此言士彼言庶民者庶民可兼士也按此即冢
 宰以八灋治官府之官刑綱見於大司寇其目見
 於士師汙讀如斟酌之汙橋讀如矯制之矯邦汙
 謂探聽微密斟酌為姦者邦賊謂潛謀陰結將為
 逆亂者邦謀謂陰為反間刺探國事者犯邦令謂

故恃傲悍廢格灋令者擣邦令謂詐為王言以布于下者為邦盜謂竊取國貨以私其家者為邦朋謂結私黨以亂政者為邦誣謂造為訛言以惑眾聽者凡茲八者皆治亂之階故專以馭士其慮深矣此言士類皆無月春與月秋之別也

若邦凶荒則以荒辯之灋治之令移民通財糾守緩刑凡以財獄訟者正之以傳別約劑傳音附約於妙反

釋曰鄭氏曰辯當為貶猶朝士之凶荒慮刑貶謂國事有所貶損作權時法也愚謂當如字荒辯之灋即移民通財民可移則移之以就穡或通財移

穀以賙之即梁惠王所謂河內凶則移其民於河東移其粟於河內此即古荒辯之法也糾守防寇盜也緩刑舒民心也凶年行其數事亦荒政之在刑官者耳傳謂地傳以為之保別為判書以為之合約謂書其約信劑謂官給券書以財獄訟必稽此四者然後其實偽可知也故以此正之則無敢苟簡於其始而獄訟由之而省也易之訟曰君子以作事謀始者此也

若祭勝國之社稷則為之尸王燕出入則前驅而辟釋曰勝國為吾所勝之國謂先朝亡國也亡國社

稷亦祭之安其神也以刑官為尸滅亡類也自治
 朝而退於內朝謂燕朝自燕朝而退於寢謂之燕
 寢燕出入凡非視朝大事出入及宮苑皆是前驅
 者前王而行辟者辟除行人士師為之尚嚴也
 祀五帝則沃尸及王盥泊鑊水凡刳珥則奉犬牲諸
 侯為賓則帥其屬而蹕于王宮大喪亦如之大師帥
 其屬而禁逆軍旅者與犯師禁者而戮之歲終則令
 正要會正歲帥其屬而憲禁令于國及郊野

釋曰古祀帝亦用尸尸入門以槃匱盥水則士師
 沃之王將獻尸必就洗以致潔則士泊而增其鑊

水以待小司寇沃王也刳珥用牲以釁也毛者曰

刳羽者曰珥賓喪之禮皆以刑官蹕之致其嚴也

王氏曰大小司寇使其屬弗親蹕也士師帥其屬

親蹕矣大司寇蹕邦事小司寇蹕國事故士師蹕

王宮而已行師而不從命令者曰逆軍旅臨陣而

不用命者曰犯師禁治兵以嚴為主故帥其屬而

戮之正要會定計簿也歲終士師正之正歲小司

寇乃命其屬入會故也去國百里內為郊郊外曰

野士師正歲帥其屬憲禁令亦使之無犯故也
 葉氏曰為政至於用刑豈聖人之得已哉詳觀司

冠數官大抵卹刑之意多用刑之意少設官之意
蓋以刑禁民非以刑刑民也舜告臯陶曰刑期無
刑成王告康叔曰辟以止辟如必察察焉以治獄
聽訟爲能非王政之所尚也司寇以五刑糾萬民
不施其刑而功命德能愿之是尚不察其罪而守
孝職恭之是糾曰尚者開其向慕也曰糾者糾其
過使之歸正也初何意於用刑也八辟麗邦灋其
當刑故不可循情而違灋其當宥又不可記過而
忘功麗于灋者不出于私情附于刑者實在于公
議又何心于用刑乎此猶曰刑不上大夫士節不

可不厲也至於萬民之有獄訟者使入束矢鈞金
蓋取其辭之直與其信之堅而後聽之豈非使民
無訟乎其麗于刑罰也士師以五禁左右之徇于
朝又垂于門閭使之知所禁止以五戒先後之使
之知所警戒此非刑期無刑乎大司寇正月垂象
而使觀小司寇正歲帥官屬而憲刑禁士師正歲
則帥屬而憲禁令布憲則正月執旌節而憲刑禁
又有禁殺戮禁暴氏惟恐民之陷于罪也司刺則
訊群臣訊群吏又訊之萬民必其左右大夫與國
人皆曰可刑然後刑之如吏民以爲不可小則宥

之大則赦之宥之則以其不識過失遺忘也赦之則以其幼弱老耄蠢愚也至於死刑之不可免也鄉則王會其期遂則王命三公會其期縣則命六卿會其期欲合衆議而免之也此正所謂辟以止辟之義也故大司寇一官雖掌邦刑也而曰掌邦禁周官亦如之焉則其設刑也固欲詰姦慝刑暴亂以格其非心也至於五刑之用豈聖人之心哉鄉士掌國中各掌其鄉之民數而糾戒之聽其獄訟察其辭辯其獄訟異其死刑之罪而要之旬而職聽于朝司寇聽之斷其獄弊其訟于朝群士司刑皆在各麗其灋以議獄訟獄訟成士師受中協日刑殺肆之三日若欲免之則王會其期

釋曰六鄉之獄皆在國中而鄉士主之鄉之民數亦掌于鄉士而糾察戒飭焉所以輔佐吾民俾安于中而不至抵于刑憲也六鄉之民有獄訟則鄉士聽之察其辭之虛實辨其情之故誤其有犯死罪者有死刑罪者或輕或重既定則殊異其文案斷罪之書以藏之又爲其罪灋之要辭如今之畧節招情是也囚旣伏罪仍至十日而無悔異乃以職事聽于外朝司寇從而審之果得其情乃就外

朝斷之示無所容私也。群士司刑之官皆在者合衆官而參議焉。不敢以獨見斷也。各麗其灋以議獄訟者。群士司刑各有所掌。若司刑掌五刑之灋。司刺掌三赦三刺三宥之灋。故各麗其灋也。王制曰。凡聽五刑之訟。必原父子之親。立君臣之義。以權其輕重之序。慎測淺深之量。以別之。悉其聰明。致其忠愛。以盡之。此足以見當時之所議矣。獄訟成。士師受中者。成罪已成定也。合乎灋得其情之謂中。士師受其定罪合中之文辭也。協合也和合。善日以爲刑殺之期。肆陳也。既殺則陳尸三日。暴其罪與衆棄之。且以懲乎未犯者。免猶赦也。期謂鄉士聽職于朝。司寇聽獄之時。親至外朝。以八議定其取舍。亦不敢以己意廢天討之公也。此足以見先王之時。有一獄訟所屬之士。已聽之矣。而司寇又聽之。群士司刑又議之。士師又受之。欲免其罪。則又或王或三公六卿會其期。凡更數人而後成。蓋不敢妄加人以罪如此。

大祭祀大喪紀大軍旅大賓客則各掌其鄉之禁令。帥其屬夾道而蹕。三公若有邦事則爲之前驅而辟。其喪亦如之。凡國有大事則戮其犯命者。

夾古洽反

釋曰祭祀喪紀軍旅賓客六鄉皆有共焉故帥屬夾道而蹕以士官爲之欲嚴肅人無敢犯也三公與王論道者若以國事至鄉則爲之前驅而辟行人也大事謂軍旅田役之事若鄉衆鄉師治之而鄉士則戮其犯命者掌刑罰故也

遂士掌四郊各掌其遂之民數而糾其戒令聽其獄訟察其辭辨其獄訟異其死刑之罪而要之二旬而職聽于朝司寇聽之斷其獄弊其訟于朝群士司刑皆在各麗其灋以議獄訟獄訟成士師受中協日就郊而刑殺各於其遂肆之三日若欲免之則王令三公會其期若邦有大事聚衆庶則各掌其遂之禁令帥其屬而蹕六卿若有邦事則爲之前驅而辟其喪亦如之凡郊有大事則戮其犯命者

釋曰六遂之獄在四郊遂士主之二旬而職聽于朝去王城漸遠故其期不同焉令三公會其期者殺於鄉也聚衆庶遂士則各掌其遂之禁令戮其犯命者司刑故也六卿有事於遂則遂士爲之前驅而辟行人焉餘見上

縣士掌野各掌其縣之民數糾其戒令而聽其獄訟察其辭辨其獄訟異其死刑之罪而要之三旬而職

聽于朝司寇聽之斷其獄蔽其訟于朝群士司刑皆在各麗其灋以議獄訟獄訟成士師受中協日刑殺各就其縣肆之三日若欲免之則王命六卿會其期若邦有大役聚衆庶則各掌其縣之禁令若大夫有邦事則爲之前驅而辟其喪亦如之凡野有大事則戮其犯命者

釋曰郊外曰野自二百里至三百里大夫所食之采邑或公邑也三甸職聽于朝者去王城稍遠故加十日也命六卿會其期者縣士職聽之時命六卿往議之也掌禁令戮犯命皆如遂士

方士掌都家聽其獄訟之辭辨其死刑之罪而要之三月而上獄訟于國司寇聽其成于朝群士司刑皆在各麗其灋以議獄訟獄訟成士師受中書其刑殺之成與其聽獄訟者凡都家之大事聚衆庶各掌其方之禁令以時脩其縣灋若歲終則省之而誅賞焉凡都家之士所上則主之

釋曰大都在疆地小都在縣地家邑在稍地則去王城愈遠其都家之主則王之三公及王子卿大夫皆身居王朝而食采於三百里四百里五百里之內者故遂士縣士皆得以職聽于朝而方士則

三月乃上獄訟于國者其主在國上於都家之主其主乃付於司寇聽其成也群士司刑參斷之情與灋相應乃麗于律灋以爲中然後士師受之士師又書其當刑當殺之成于案以備稽考又書其治獄之吏姓名以備反覆失實者蓋以其遠故特詳焉協日刑殺則各於其處以王命焉縣灋脩之者都鄙比居之灋至縣而止其夫家田萊之數六畜車輦之稽皆如鄉遂不言鄉遂者大都不可耦國亦至縣鄙比居之灋惟於此見之故曰以時脩其縣灋也歲終又省之亦於閭里校比之事鄉士遂士掌民數之意也方士在朝都家各有士在都家之中故其所治之獄訟各上于方士主之然後上于國也

李氏曰君之於民猶親之於子也親則不忍其子君焉得忍其民哉惟其不忍之心則人無有可戮罪無有可刑王欲赦固其理也然而天討有罪王者奉之以作五刑刑者非王之意也天之意也非天之意天下人之意也殺人者死而民猶有相殺傷人者刑而民猶有相傷苟以不忍而赦之則殺人者不死傷人者不刑殺傷之者無以懲其惡被

殺傷者無以伸其寃此不近於帥賊而攻人者乎
是故先王雖有不忍之心而不敢輒赦必於外朝
與掌事者議其可否焉赦者非王赦之情可赦也
否者非王不赦情不可赦也如此則民何有不服
令何有不行

訝士掌四方之獄訟諭罪刑于邦國凡四方之有治
于士者造焉四方有亂獄則往而成之邦有賓客則
與行人送逆之入於國則爲之前驅而辟野亦如之
居館則帥其屬而爲之蹕誅戮暴客者客出入則道
之有治則贊之凡邦之大事聚衆庶則讀其誓禁

釋曰四方諸侯之來朝覲者有行人以掌其禮
訝士以掌其刑禮與刑不可偏廢也四方之獄訟
諸侯之獄訟也諭刑罪于邦國告諸侯以麗罪及
制刑之本意有治於士謂四方諸侯有獄不能斷
而讞疑辨事至者先造訝士乃通之于士師也亂
獄謂在外侯邦有上下相虐君臣宣淫者則往而
成之聽其獄正其罪以告於王也送逆謂始來及
去也以其掌四方之獄訟故賓客則與行人逆送
之入於國則爲之前驅而辟居館則帥其屬而爲
之蹕以刑官所在則人無敢犯也誅戮暴客者客

國之所禮而暴之則刑之所取故誅之戮之客出入則為之道使知所往客有事治則為之贊助使事有成國有師田之事或討伐諸侯也則訝士讀其誓命之辭及五禁之灋也

朝士掌建邦外朝之灋左九棘孤卿大夫位焉群士在其後右九棘公侯伯子男位焉群吏在其後面三槐三公位焉州長衆庶在其後左嘉石平罷民焉右肺石達窮民焉帥其屬而以鞭呼趨且辟禁慢朝錯

族談者罷音疲

釋曰外朝在雉門之外兩觀之間王者詢衆庶群

士聽獄訟皆在於是焉小司寇掌其灋朝士掌其

不位棘取其赤心事上無隱而能制禦于外者也槐

取其黃中通理暢于四肢臣德之至也孤卿大夫

大臣道也比諸侯為卑故位於左侯伯子男君道也

比諸臣為尊故位於右三孤六卿其位凡九諸侯

列於四國其服亦九故左右皆九棘太師太傅太

保其位止於三故面三槐嘉石所以平罷民之不

能自強以禮然必在左者卑之而示其辱故爾肺

石所以達窮民之不能自伸其情然必在右者佑

之欲其伸故爾以鞭呼趨且辟執鞭以威之呼朝

者使之趨呼行者使之辟所以肅朝儀也慢朝謂處班行而不肅也錯立謂班行不整者族談謂違班位而聚談者夫禁慢朝者則使之欽禁錯立則使之正禁族談則使之靜朝士掌外朝之灋振肅朝儀者如此

凡得獲貨賄人民六畜者委于朝告于士旬而舉之大者公之小者庶民私之凡士之治有期日國中一旬郊二旬野三旬都三月邦國暮期內之治聽期外不聽

釋曰獲亦得也謂所拾得者也人民小者未齡七

歲以下凡貨賄人民六畜至於遺失有得獲者委於聽訟之朝告於朝士而不敢私焉以待其人而反之至于旬則亦久矣於是舉之大者入于公小者歸于拾得之人士之治有期日使來於外朝職聽之以遠近節之故期內聽期外不聽亦息訟之一端也國中一旬鄉士也郊二旬遂士也野三旬縣士也都三月方士也邦國暮訝士也蓋民之獄訟宜以時治苟不急又在期外亦可以已矣又况獄訟追證聯逮及於平民烏可久哉

凡有責者有判書以治則聽凡民同貨財者令以國

灋行之犯令者刑罰之凡屬責者以其地傳而聽其

辭屬音燭
爾傳音付

請細數久於平刃為百入始

釋曰責者責償其所欠也判書謂凡借貸者書其數而中分之各執其一有判書可以驗其實故聽之無判書則不聽者所以養信而息訟也同貨財如令合錢與販者以國灋行之謂以節傳出納之犯令者如貨不出於關者舉其貨罰其人是也二人同財一人犯令則刑罰惟施於犯令者不及其儕也凡責者有判書屬責者無判書或有單書口屬而責者則以其地相比近之人俟來乃受其辭

而治之也

凡盜賊軍鄉邑及家人殺之無罪凡報仇讎者書於土殺之無罪若邦凶荒札喪寇戎之故則令邦國都家縣鄙刑貶

釋曰軍猶攻也盜賊明聚攻剽鄉邑及家虜辱者殺越人于貨凡民罔不熟有卒伍追胥之灋殺之無罪仇讎之復雖出於私情苟同國不相避必將報之不得擅殺必書於土罪昭著則殺之無罪非擅殺也慮猶圖也貶減損也王氏曰凶而至於荒札而至於喪寇而至於戎皆故之大者其所制之

刑所用之財宜有異於平日故令邦國都家縣鄙
慮刑貶先事而思患謂之慮慮刑則刑之加釋有
趣一時之宜者慮以制之也慮貶則財省殺則紓
一時之急者慮以節之也慮刑則非獨緩刑也慮
貶則非特省禮也皆出於不得已也

司民掌登萬民之數自生齒以上皆書於版辨其國
中與其都鄙及其郊野異其男女歲登下其死生及
三年大比以萬民之數詔司寇司寇及孟冬祀司民
之日獻其數於王王拜受之登於天府內史司會冢
宰貳之以贊王治

釋曰登上也民數司於刑官者制刑本以生民且
司民數則不犯刑者亦知懼此刑官之權也男八
月女七月而生齒版今戶籍也國中都鄙郊野合
王畿之內而辨其地之所著也異其男女知所以
成夫家也下除去也每歲之終必著其生去其死
然後可以驗其實也地官冬官之所校登夫家田
萊之數只及於司徒司空以詔廢置誅賞而民數
則專以司民掌之三年大比則以民數之籍上司
寇司民軒轅之角星也孟冬祀之以保民使繁庶
也祀畢乃獻民數於王民爲國之本故王拜而受

之登于天府與宗廟寶共藏者民爲貴社稷次之君爲輕故也內史司會冢宰貳之將視年之豐儉以制國用而觀其土著治否之實也贊王治觀其盈縮以考主民之吏之能否也

徐幹曰民數爲國之本也先王周知其萬民衆寡之數乃分九職九職既分則劬勞者可見勤惰者可聞也然事役不均未之有也事役既均故上盡其心而人竭其力國家殷富大小不匱百姓休和下無怨疾焉周禮孟冬祀司民獻民數於玉王拜受之登于天府其重也如此今之爲政者未之知

恤也譬如無田而欲樹藝雖有農夫安能措其強力乎是以先王致六鄉六遂之灋所以維持其民而爲之綱目也使其鄰比相保賞罰相延及出入存亡臧否逆順可得而知也及亂君之爲政也戶口漏於國版夫家脫於聯伍避役逋逃者有之於是奸心競生而僞端並作小則竊濫大則攻劫嚴刑峻令不能救也民數者庶事之所自出也莫敢不正焉以分田里以令貢賦以制祿食以起田役以作軍旅國以建典家以立度五禮用脩五刑用措其惟審民數乎

司刑掌五刑之灋以麗萬民之罪墨罪五百劓罪五百

百宮罪五百劓罪五百殺罪五百若司寇斷獄弊訟

則以五刑之灋詔刑罰而以辨罪之輕重劓魚器反刑音月

釋曰民之有罪者以五刑之灋麗之皆虧體肉刑

也墨者刻其面以墨室之劓者截其鼻形不完矣

宮者男子去勢而為奄女子幽閉而為奚去勢者

去其陽幽閉者閉其陰蓋女子去其生本則幽陰

閉塞矣劓者斷其足使不能行動則惡何自施殺

則死刑也亦有異焉若司寇斷獄弊訟之時則以

五刑之書三千條件往辨其罪之輕重所當麗之

刑而詔之如今律家所署灋矣此非精於灋律者

不能也故特設其官焉○王氏曰周禮五刑之灋

皆五百而呂刑墨劓之屬皆千宮之屬則三百大

辟則二百者此所謂刑罰世輕世重也以刑之灋

詔刑罰所謂惟灋惟察其審克之也而以辨罪之

輕重所謂上下比罪上刑適輕下服下刑適重上

服是也也亦子曰民無之屬三千蓋亦灋也

原曰五刑之屬凡二千五百穆王訓夏贖刑曰五

刑之屬三千班固以司刑二千五百為中典呂刑

五百而殺罪五百則周之刑爲重矣蓋刑非以屬之數而分輕重之也刑止五而已行之既久人情事變獨詳故穆王有其屬三千之云非所以爲重輕之別也孔子曰五刑之屬三千蓋亦據後王之刑條爲言也蓋五刑肉辟也肉辟之用虧人形體聖人誠有甚不得已焉者然亦本諸天理之極爲天地立心爲百世生民立命而制之也以五刑而論之人之爲惡生於心必待形以運之然後其惡成焉聖人制刑辱其形所以懲其心殘其形所以制其心也然此聖人猶欲生之也至於罪大惡極天討不加人道廢矣乃殺之焉故嘉石園土者勞苦之困辱之猶愛而教之能改則復之尚可齒於平人也至於墨劓宮刑以其終不能改也然後刑之惡心雖存不得肆矣故肉刑者天理之極人情之當至公至平之制也自二帝三王循而不廢世道之隆非後世所及者以肉刑存焉耳漢文帝感一女子之言遂廢從古帝王循守之大灋豈帝王好生之德不若後世之中主臯陶伊傳周召之仁智不若漢世一女子哉以無明見遠識之智徂目前之小慈不見天地聖人之心不顧世道之害故

耳噫肉刑其可廢哉

司刺掌三刺三宥三赦之灋以贊司寇聽獄訟一刺曰訊羣臣再刺曰訊羣吏三刺曰訊萬民一宥曰不識再宥曰過失三宥曰遺忘一赦曰幼弱再赦曰老旄三赦曰憊愚以此三灋者求民情斷民中而施上服下服之罪然後刑殺

刺七賜反忘音妄旄音老憊勅江反

釋曰刺殺也訊而罪定則殺之訊問也掌以司寇已成之獄訟問於衆人宥寬也赦舍也贊助也人之犯罪重者有至於殺故有三刺之灋其罪有被之五刑則已重加之鞭朴爲已輕則宥而寬之故

有三宥之灋至於情之可矜而五刑疑於無罪則從而赦之故有三舍之灋三刺者罪雖當死不遽殺之一則詢諸公卿大夫二則詢諸府史之卑三則詢諸國人之衆國人皆以爲可殺然後施刑焉三訊則於我無憾矣又求以寬之曰豈其人之不識乎豈其人之過失乎豈其人之遺忘乎有是三者則宥以寬之也又求之於心曰其人年少而微弱也其人年老而昏耄也其人憊愚而無知也有是三者則不止於宥而直舍之也以此三灋者求民情斷民中則情盡於內辭孚於外因灋以議罪

因罪以施刑情重者服上刑情輕者服下刑然後
 刑之殺之則彼我皆無憾矣劉氏曰今律三刺之
 灋皆存特不分職以專掌之而有審刑之官聖人
 之仁古今雖邈而其志同矣

司約掌邦國及萬民之約劑治神之約為上治民之
 約次之治地之約次之治功之約次之治噐之約次
 之治摯之約次之

釋曰約信也劑券書也以言語之信為文書於券
 也治者定也恐其相抵冒上下之差故以約治之
 也神約謂社稷山川所命祀者民約謂賦貢力役
 所供者地約謂疆界所至山川所屬也功約謂王
 功國功軍功民功之屬不可忘也噐約謂車旗尊
 彝禮樂所用也摯約謂玉帛禽鳥所當執者有約
 以結其信有劑以固其約灋已定於先則後世循
 守者孰敢違哉

凡大約劑書於宗彝小約劑書於丹圖若有訟者則
 珥而辟藏其不信者服墨刑若大亂則六官辟藏其
 不信者殺珥作岬藏
木浪反

釋曰大約劑邦國諸侯之約書於宗廟之彝噐至
 貴至重盟諸鬼神也小約劑萬民約也書於丹圖

圖書以丹爲地而書其上古無紙也訟謂爭六事之約有不明不如始約而爭者辟開也藏約所藏也則開其所藏之約示之不信是踰約僭奪也服墨刑踰約之刑大亂謂所僭踰者大如并國旅泰山之類六官初受盟約之貳同開藏約之書以視之有不如約則誅之也約則約於人盟則約於神司約掌其約書於初封之時司盟則掌其盟書於既封之後

司盟掌盟載之灋凡邦國有疑會同則掌其盟約之載及其禮儀北面詔明神既盟則貳之

釋曰盟結信而誓諸神也載爲約而載諸書也凡邦國有疑而會同焉則司盟掌其結盟之載書與合盟之禮儀明神如日月山川是也北面詔之者讀載書以告之也既盟之後上其載書於天府藏其貳於司盟也王氏曰大幽則質諸鬼神而盟者神之所爲也盟則盡諸人而約者人之所爲也盟則必約蓋非約則無以固其盟約則必盟蓋非盟則無以示其誠盟諸神約諸人所以爲結信之道也

盟萬民之犯命者誚其不信者亦如之凡民之有約

劑者其貳在司盟有獄訟者則使之盟詛凡盟詛各以其地域之衆庶共其牲而致焉既盟則為司盟共

祈酒脯

詛側慮反為千偽反

釋曰犯命犯君教令也不信違約也凡盟皆北面

詔明神大者為盟小者為詛詛咀也夫萬民之犯

命者誅不信者刑何詛盟之有犯命不信以詛盟

而免刑誅則人孰不從詛盟而覲免神誅哉蓋犯

命不信為人所訟無所左驗則難加刑故令其盟

誓而自詛焉其不自欺於神耳此亦聽訟之一

灋也凡民之有約劑者謂與儕輩要約之事有約

書者則人既收其一藏其貳於司盟後有反覆而

獄訟者則詣司盟啓貳以合之則曲直辨矣其自

相違約有獄訟者則使之盟詛不信則不敢聽此

盟詛所以省獄訟也各以其地域共其牲而致焉

既盟則為司盟共祈酒脯者謂使其邑閭出牲而

來盟已又使出酒脯司盟為之祈明神使不信者

必凶司盟之設宋之大儒皆疑以為信義不足自

結而恃於鬼神末矣愚以為惟此益以信其為治

世之灋王道之備也蓋惟世治然後民知自愛知

自愛則畏禍畏禍斯敬信神明矣今有千金之子

禮記卷之二十一
雖使之破數百金不惜也。違心而詛咀於神不肯為矣。司盟之息訟非治世之事乎。苟末世衰亂民身且不自保何有於神。老子曰民不畏死奈何以死懼之。利之所在刑殺之且不懼何有於盟乎。故先儒以盟為衰世之事而王道所棄者殆未見於此矣。

王氏曰先王之時貴而諸侯賤而萬民皆有盟詛之灋者豈徒聽於神之虛拘哉。蓋世之治也人心以誠相示知欽畏於神而不敢欺慢焉。先王因其有欽畏鬼神之心而因以先之則必以獲詛盟為

大戮。至於成俗則盟邦國之不協與萬民之犯命而詛不信者有獄訟者使之盟詛弭亂息爭豈小補哉。呂刑曰民興胥慚泯泯焚焚罔中于信以覆詛盟以為苗民之罪則盟詛之設帝者之世已然矣。而作記者以為詛盟不及三王不亦謬乎。然事有本末本之不圖無事於末後世仁義不足以勝之欽畏不足以臨之慢神於上誣人於下區區之牲血酒脯不足以勝背誕之衆矣。此君子屢盟詩人所以謂之長亂小國爭盟左氏所以知其必亡。鄢陵之盟季文子曰德則不競尋盟何為武父之

盟君子曰信之不繼盟無益也豈盟之不足恃哉
失之本求之末此其所以滋亂也

職金掌凡金玉錫石丹青之戒令受其入征者辨其
物之媿惡與其數量揭而璽之入其金錫于爲兵器
之府入其玉石丹青于守藏之府入其要掌受士之
金罰貨罰入于司兵

釋曰石瑤琨之類丹丹砂也青空青也上以政取
謂之征下以職共謂之貢受其入則取諸冬官所
入者受其征則取諸民而官所賦歛者辨其物之
美惡以知貴賤與其數量以知多寡也揭而璽之

者標識其名物而封之以璽印也此蓋地征之物
入于職金宜在天官今在秋官者以士之罰金在
焉也金錫可以爲兵器故入于橐人所謂受財于
職金以齎其工是也玉石丹青非所常用者故入
于玉府所謂掌金玉玩好之物是也要計書也入
其總數于大府也金罰即鈞金貨罰司關所謂凡
貨不出於關舉其貨罰其人是也入于司兵給治
兵工直也然金亦可以作兵器貨可以市物料焉
旅于上帝則共其金版饗諸侯亦如之凡國有大故
而用金石則掌其令

釋曰供金版者旅上帝則張瓊案設皇邸邸後版
 屏風也以金飾之饗諸侯亦設皇邸承賓如承神
 也國有大事用金石則凡器械有用金石者則掌
 其所取之令也

司厲掌盜賊之任噐貨賄辨其物皆有數量賈而揭
 之入于司兵其奴男子入于罪隸女子入于春臺凡
 有爵者與七十者與未齒者皆不為奴

釋曰竊賄為盜強劫為賊任噐者盜賊所用傷人
 兵器貨賄所盜得之財物也賈而揭之定其價而
 識之也入于司兵以充兵器之用也凡坐盜賊而

為奴者男子輸于罪隸之官女子入于春人棠人
 之官以役之有爵者不為奴貴之也七十不為奴
 老之也未齒不為奴慈之也毀齒謂之齒家語男
 子八歲毀齒女子七歲毀齒曰未齒

大人掌大牲凡祭祀共大牲用牲物伏瘞亦如之凡
 幾珥沈辜用駝可也凡相犬牽犬者屬焉掌其政治

牲音全瘞於倒反幾讀為劓珥
 當為岬駝亡江反相息亮反

釋曰色純謂之牲啓毛以告牲貴純也伏謂輟然
 王出則伏犬牲以車轡之而去也瘞謂地祭曰瘞
 埋也幾珥士師所謂劓珥則奉犬牲是也沈辜大

宗伯所謂以貍沈祭山林川澤以鬮辜祭四方百
物是也用駝不若用牲之爲善故曰可也相犬察
知善惡者以屬有買四人也牽犬者以屬有徒十
六人也掌其政令則以犬人非特祭祀之大而已
凡田犬并掌故也

司圜掌收教罷民凡害人者弗使冠飾而加明刑焉
任之以事而收教之能改者上罪三年而舍中罪二
年而舍下罪一年而舍其不能改而出圜土者殺雖
出三年不齒凡圜土之刑人也不虧體其罰人也不
虧財

釋曰罷民謂惡人不化爲百姓所患苦而未入五
刑者收教者拘之圜土使省愆思善是所以教之
也弗使冠飾示不能以禮自飾其躬也加明刑者
書其過惡於背以耻之晝則役諸司空以勞之皆
欲其自怨自艾也其能改者以罪之輕重爲久近
之期而舍之其不能改而出圜土者殺之雖年滿
得出而猶不得齒於倫類者三年所以深懲之也
凡刑人必虧體罰人必虧財圜土之刑則加明刑
而已異於五刑之傷肌圜土之罰則役之以事而
已異於五罰之出鍰也此之謂收教欲使之改過

爲平人也

葉氏曰禁民以刑者過其惡於未萌道之以教者

格其非於無過書曰明于五刑以弼五教又曰勿

庸殺之姑惟教之是先王有以教之於其始而後

禁之於其終也司諫職曰糾其德行而勸之朋友

正其行而強之道藝是有以驅之於善也司救職

曰凡民有表惡過失則誅之以禮防禁而救之是

又有以懲民於惡也其有表惡者三責而後罰三

罰而未耻則以嘉石坐之有過失者三責而後罰

三罰而未改則以圜土納之先王始拳拳於教官

之諫救而後凜凜乎刑官之詰禁况嘉石則曰平

罷民圜土則曰聚教罷民此則曰收教罷民不惟

教之于未犯刑之先而且教之於既犯刑之後是

雖國有五刑聖人豈輕用之也哉

掌囚掌守盜賊凡囚者上罪桎拳而桎中罪桎桎下

罪桎王之同族拳有爵者桎以待蔽罪及刑殺告刑

于王拳而適朝士加明桎以適市而刑殺之凡有爵

者與王之同族拳而適甸師氏以待刑殺

桎古毒反
拳姜奉反

釋曰凡囚凡以罪拘者桎桎拳三者拘囚之械也

木其手曰拳木其項曰桎木其足曰桎三木備者

重囚也、輕者桎而已、王之同族則拳其手、有官爵者則桎其足、以待斷罪、及刑殺之時、則告于王、以今日當行刑、及所刑姓名也、其死罪則曰某之罪在大辟、其刑罪則曰某之罪在小辟、既告于王、又適朝士、蓋以朝士掌外朝、又得以詳審焉、朝士以爲無可疑、則加明梏於桎、上書其所犯、使見咸知其罪、乃適市而殺之、與衆棄之也、凡有爵者與王之同族、當殺則拳而適甸、師氏以待刑殺、刑于隱者親親、貴貴之義、不與庶人同也。

李氏曰、先生之時、雖同族、雖有爵、其犯灋、當刑、與庶民無以異也、灋者、天子所與天下共也、如使同族犯之、而不刑殺、是爲君者私其親也、有爵者犯而不刑殺、是爲臣者私其身也、君私其親、臣私其身、君臣自私、則五刑之屬三千、止爲民也、賞慶則貴者先得、刑罰則賤者獨當、上不媿於下、下不平於上、豈適治之道耶、故王者不辨親疎、不異貴賤、一致于灋、其所以不肆諸市朝、而適甸、師氏者、爲其有耻、毋使人見之也、文王世子曰、公族之罪、雖親、不以犯有司、正術也、所以體百姓也、刑于隱者、不與國人慮兄弟也。

掌戮掌斬殺賊謀而搏之凡殺其親者焚之殺王之親者辜之凡殺人者踣諸市肆之三日刑盜于市凡罪之麗于灋者亦如之唯王之同族與有爵者殺之于甸師氏凡軍旅田役斬殺刑戮亦如之

臨皮比反

釋曰賊謂陰圖不軌者謀謂為敵間探者其罪不可赦也故大者斬之小者殺之搏謂去衣磔之以示眾也殺其親者焚而燒之不存其形殺王之親者辜而磔之不全其體殺人者謀殺故殺之類僵尸于市以懲不道陳尸三日然後除之盜之罪未至於死者亦刑于市以入之其他罪犯灋者亦刑

之于市也王之同族與有爵既言於掌囚此復言之者掌囚待刑殺此則正殺之也軍旅田役有斬殺有刑戮其灋亦如之焉

墨者使守門劓者使守關宮者使守內劓者使守圜

髡者使守積

髡苦門反積子賜反

釋曰黥者無妨於禁禦故可使守門截鼻者以貌惡遠之故可使守關宮者人道絕故可使守內以嚴內外之辨也斷足者驅較禽獸不能死守而已故可使守圜王族無宮刑惡翦其類也髡頭而已貨財積於隱處故使髡髮者守之王氏曰用刑人

者刑之以償其罪也養之以全其生也使之以致其用也先王之於刑人猶其民也無所喜怒而有不全其生者彼其自取非王刑之也

司隸掌五隸之灋辨其物而掌其政令帥其民而搏盜賊役國中之辱事爲百官積任噐凡囚執人之事邦有祭祀賓客喪紀之事則役其煩辱之事掌帥四翟之隸使之皆服其邦之服執其邦之兵守王宮與野舍之厲禁

釋曰五隸罪隸與四翟之隸也掌其灋則役使之差等有數存焉故也辨其物則衣服兵噐之屬也

民謂五隸之民也盜賊之未獲者則司隸帥而搏之國中污辱之事則司隸帥而役之百官任用之噐亦爲其民積之也凡囚執罪人之事亦使爲之也服邦服以其所素安執邦兵以其所素習在內則使之守王宮在外則使守野舍之厲禁皆司隸帥之蓋古者天子守在四夷治教刑之旣明則四夷之民莫不向風懷德故使之守內外而不以爲嫌用其兵服而不以爲虞也

罪隸掌役百官府與凡有守者掌使令之小事凡封國若家牛助爲牽傍其守王宮與其厲禁者如蠻隸

之事徬步浪反

釋曰百官府與有守者則罪隸為之役雖充其役亦掌使令之小事而已封國若家謂建諸侯立大夫也牛助封國以牛助其轉徙也在前曰牽在傍護之曰徬皆罪隸為送致也

蠻隸掌役校人養馬其在王宮者執其國之兵以守王宮在野外則守厲禁

釋曰蠻役使養馬各以其宜校人其徒八十人王馬千匹不足以給其役故蠻隸兼役其事也亦各從其便器以為守衛之備故懸其國之兵○陳氏

曰古之宿衛王宮者不特士庶子而已有虎賁之虎士司隸之五隸虎士有卒伍而四翟之隸有兵國有大事則守王門舍則守王閑則王之在國在野可謂嚴矣然必使四翟之隸者以著王之所守在四夷也或使師氏之屬帥之者著王之使武以文也四隸所守如蠻隸之事者周之時以南方為遠尤貴其來故掌四夷之官曰象胥詩曰以雅以南記曰胥鼓南則周人之意可知矣

閩隸掌役畜養鳥而阜蕃教擾之掌子則取隸焉

釋曰掌役畜養鳥則役於掌畜也阜蕃教擾與掌

畜同事也。掌子鄭氏曰：王立世子，置臣使掌其家事，而以閩隸役之。司隸言帥四翟之隸，守王宮與野舍之厲禁，則閩隸有守可知矣。

夷隸掌役牧人養牛馬與鳥言，其守王宮者與其守厲禁者如蠻隸之事。

釋曰：牧人掌牧牛馬者也。夷隸則受役於牧人，以共芻莖之事焉。夷狄之人或曉鳥獸之言，故春秋傳曰：介葛盧聞牛鳴曰：是生三犧，皆用矣。故貉隸掌與獸言。

貉隸掌役服不氏而養獸而教擾之，掌與獸言，其守王宮者與其守厲禁者如蠻隸之事。

釋曰：獸謂熊虎兕象之屬，不言阜蕃者，猛獸不乳於囿檻也。夷隸與鳥言，故貉隸與獸言。夷貉之人近於鳥獸，故識其言也。

原曰：先王之馭夷狄也，侵凌則薄伐之，驅之荒服之外而已，不窮追也。其有慕義而來朝貢者，禮而歸之而已。其有或屈於勢，舍其本國而來歸附者，先王使之入于司隸，每隸百二十人，而不盡收可見矣。其有材藝者，如司樂作夷樂，有鞮鞻氏之類，使之養鳥獸，養牛馬禽獸畜之也。服其邦之服，執

其邦之兵不使其混華夷也。使之守王宮王門，出則守王閑，無非使之以賤役貴也。先王之待夷狄，意可見矣。後世有夷狄願內附者，加中國之衣冠，命朝廷之爵秩，令士大夫下之，徙中國之人民，以處其衆，傾中國之府廩以養之，致使夷狄生心肆其技以憑凌中國，宜乎中國莫能當。或有遂帝中華之慘也。今夷種之在中國也，混於編氓，非我族類，其心必異。時遇北風，彼固銳然起其故國之思，爲吾中華之害矣。然後知先王五隸之意，必使服其邦之服，執其邦之兵，作其邦之樂者，爲慮深矣。

秋官下

布憲掌憲邦之刑禁，正月之吉，執旌節以宣布于四方，而憲邦之刑禁，以詰四方邦國及其都鄙，達于四海。凡邦之大事，合衆庶則以刑禁號令。

釋曰：布，謂宣布；憲，謂刑憲。刑以懲惡，禁以輔刑，故有刑必有禁，刑禁之設，亦使民易避而難犯耳。先王懼四方之遠，不能周知，於是設布憲之官，正月之吉，執旌節帥其屬，以宣布於四方，而憲于民，以國之刑禁，使家喻戶曉，而不敢犯。自邦國至都鄙，以達于四海，無不知國灋之當守也。國有大事而

合人民則以國之刑禁號召命令之也刑者王政之本故丁寧焉達于四海者必書其刑禁之灋憲于民者達于方伯連帥使之各憲于所治布憲則執旌節以巡行四方詰其違禁令者然後刑禁可以達于四海矣

禁殺戮掌司斬殺戮者凡傷人見血而不以告者攘獄者遏訟者以告而誅之

釋曰司猶察也殺戮者上之施刑于下也下以非灋相殺戮及傷人見血而里閭壅不以告于有司者攘劫獄囚使不得正其罪者止遏民訟使不得直于官者如此則姦凶得以侵善良勢力得以抑窮弱民之情將鬱而不伸下之惡將長而不革禁殺戮以此四者告于司寇之屬而誅罰之是所以怙善良而佑窮弱也

禁暴氏掌禁庶民之亂暴力正者矯誣犯禁者作言語而不信者以告而誅之凡國聚衆庶則戮其犯禁者以徇凡奚隸聚而出入者則司牧之戮其犯禁者釋曰亂謂悖於人倫暴謂虐其鄉里力正謂脅衆從已以邪為正矯誣犯禁謂矯誣罔冒犯國禁也作言語不信謂造為浮言鼓惑人心也王制曰析

言破律亂名改作執左道以亂政者殺行僞而堅
言僞而辯學非而博順非而澤以疑衆者殺凡此
皆害於正教敗壞風俗者也故禁暴民糾之以告
於司寇而誅之宜矣大衆所聚有犯禁者則戮之
以徇于衆奚官刑之女爲奴者隸男子爲奴者其
聚出入有陰謀也則司以察之牧以治之亦以防
其暴也故犯禁則戮之也

野廬氏掌達國道路至於四畿比國郊及野之道路
宿息井樹若有賓客則令守涂地之人聚橐之有相
翔者誅之凡道路之舟車輦互者叙而行之

橐音託
輦音記

釋曰達國道路至于四畿者謂循行脩築使不陷
絕而車馬可通于畿也凡國野之道十里有廬三
十里有路室五十里有侯館所以待賓客使命之
往來而遣人掌其委積野廬則掌其廬自國及郊
自郊及野皆有宿息井樹夜可以寢晝可以憇有
井以備飲食有樹以爲籓蔽所以待賓旅也守涂
地之人廬傍居民也聚而擊析所以防暴客也相
翔如鳥之翔而後集相視翔玩觀伺欲爲寇盜者
誅之以禦姦也輦者相值而礙也互者交互不得
行也舟車行於水陸偶相值而輦互阻礙則因其

先後之叙以次而行勿使爭先也

凡有節者及有爵者至則為之辟禁野之橫行徑踰者凡國之大事比脩除道路者掌凡道禁邦之大師則令掃道路且以幾禁行作不時者不物者

釋曰有節者至則欲達之而為辟尊王命也有爵者至則在所承故為之辟敬王官也橫行妄行而暴禾稼者徑踰捷出而越隄渠也皆禁之國有師田之事而修道則比較其夫役道禁道路有禁令野廬氏掌之不時謂行作失早晚之時不物謂操持非常之物幾禁之者備姦人內賊及反間

蜡氏掌除骹凡國之大祭祀令州里除不蠲禁刑者任人及凶服者以及郊野大師大賓客亦如之若有死於道路者則令埋而致揭焉書其日月焉縣其衣服任噐于有地之官以待其人掌凡國之骹禁

蜡清
願反
縣音玄
骹以賜反

釋曰骹死人骨也除者屏而埋之不令暴露於溝壑道途也蠲潔也大祭祀所以致精神之至以交乎神明之德不以哀樂惡欲貳其心又去物之可以昏憤其志意者故令州里凡不蠲之物則除之受黥劓之刑者荷楛拳之具者服衰麻之衣者則

周禮全經 卷之十一 五十一
禁之不使接於耳目也大賓客如之承賓如承神
也有行旅死於途者無人收斂既為斂而瘞之又
削木書其日月植于瘞所使其親得以識而取之
也地官閭胥里宰之屬也有衣服任器則縣之酖
禁如孟春埋齒掩骼之屬蜡氏掌之也

雍氏掌溝瀆澮池之禁凡害於國稼者春令為阱獲
溝瀆之利於民者秋令塞阱杜獲禁山之為苑澤之

沈者

阱在性反
獲胡化反

釋曰溝瀆澮池田間畜水者也穿地為穴以陷獸
謂之阱於阱中設木以載禽獸入陷者使足不着

地謂之獲春令為阱獲以農事方興恐禽獸害稼
也故預為防之溝瀆防旱潦也故禁之恐防水利
也皆利民也秋農事已成故令塞阱杜獲便行動
恐害人畜也禁不得為苑於山使草木成長也禁
不得毒餌於澤使魚鱉蕃育也此皆利民之事聖
人設官司之樽節愛養之道也

萍氏掌國之水禁譏酒謹酒禁川游者

釋曰國之水禁謂朝廷所用之水泉禁之不得與
人民雜取尊朝廷潔水泉為賓客祭祀之用也譏
酒者朝廷之酒既有酒正以下司之民間之酒其

造釀之灋賣買之度亦譏察之恐不如灋而傷人
也謹酒者無使飲酒無節至於沈湎也禁川遊無
使人狎玩於深水恐至沈溺者是水禁譏酒則欲
水與酒之潔清謹酒禁川游則恐人之沈溺溺於
酒猶其溺於水也○王氏曰譏酒則於飲酒微察
其不節者也謹酒則於用酒謹制其無度也書曰
文王誥教小子有正有事無彞酒越庶國飲惟祀
德將無醉所謂德將無醉以文王幾酒而庶國之
飲酒者皆有節也所謂越庶國飲惟祀者以文王
謹酒而庶國之用酒者皆有度也又曰羣飲汝勿
佚盡拘執以歸于周予其殺成王於酒致嚴如此
而晚周之君臣乃至於沈湎淫泆天下化之良可
惜哉

司寤氏掌夜時以星分夜以詔夜士夜禁禦晨行者
禁宵行者夜遊者

釋曰此施於國中者掌夜時者掌夜漏之早晚也
然漏箭之早晚升降亦有不應天時者必驗之於
星焉故以星之見也爲夜星之沒也爲曉而詔守
夜之士嚴夜禁之灋焉自始夜至半曰宵日未出
之時爲晨星未沒而行則禦之夜已深而行則禁

之夜而遊遨惑眾也故皆禁之

司烜氏掌以夫遂取明火於日以鑒取明水於月以

共祭祀之明盥明燭共明水凡邦之大事共墳燭庭

燎中春以木鐸修火禁于國中軍旅修火禁邦若屋

誅則為明竈焉

夫方符反墳扶云反竈昌絹反

禁釋曰夫遂陽遂也鑒方諸也二者皆鏡屬而其體

有方圓之不同先王於天地宗廟社稷之祭以陽

遂取火於日以方諸取水於月蓋欲得陰陽至精

之氣以將其誠致其潔也明盥以明水為盥盛也

明燭以明光照饌陳也共明水以明水為玄酒也

墳大也樹於門外曰墳燭樹於庭中曰庭燎皆所

以照眾為明也中春火星將出之時以木鐸修火

禁謹人戒火也軍旅脩火禁大眾所聚尤宜致謹

故也屋誅謂不殺於市而誅於甸師氏屋舍之中

所謂刑于隱者不令眾庶見也則王之同族及有

爵之刑也竈為墻以埋其尸也明竈蓋揭其罪於

竈上若明刑明梏焉或曰屋誅屋幽深如竈蓋土

室之中司烜氏以火為明而後行誅故曰明竈以

掌火也亦通

條狼氏掌執鞭以趨辟王出入則八人夾道公則六

人侯伯則四人子男則二人凡誓執鞭以趨於前且命之誓僕右曰殺誓馭曰車環誓大夫曰敢不關鞭五百誓師曰三百誓邦之太史曰殺誓小史曰墨釋曰執鞭所以爲威趨辟者以辟除行人使之避尊者也王出入則用條狼八人趨呼使避公侯伯子男皆有之卿大夫不用者君道也誓者君將行命條狼氏執鞭以誓於衆君行貴嚴肅也君登車執鞭趨前君命之誓僕右驂乘者誓曰殺言不謹則殺罪也其次則馭車者誓之曰不謹則車裂之其所有事也大夫謂戎右節服氏皆以大夫之服蓋以從王非真大夫也關者嚴謹之意敢不嚴謹則鞭五百也師者君行師從人衆也故誓之曰敢不奉紀律鞭三百也君行則太史小史從故誓太史曰殺小史曰墨者以太史知天時君之行止皆係於太史也故謹重如此然誓雖曰自近而遠然王行則八人夾王車曰誓則同時誓而後行也誓之詞非實也言此以肅之耳

脩閭氏掌比國中宿互橈者與其國粥而比其追胥者而賞罰之禁徑踰者與以兵革趨行者與馳騁於國中者邦有故則令守其閭互唯執節者不譏

弼音育

釋曰閭有閭胥矣又設脩閭之官以守閭門宿有止宿之屋有行馬之互有擊折之橈脩閭氏掌比校此三者粥養也國所遊養謂羨卒也追逐寇也胥伺盜惟田與追胥竭作則正卒羨卒偕行脩閭氏比之欲其偕出也其不出者罰之能擒捕有功者賞之徑踰行不由正道踰越垣墻者持兵被甲而趨走者躍馬駕車馳騁於國中者皆不遵灋度及惑衆也故皆禁之國有兵喪之故則令守其閭互以備不虞也執節者輔命而行不待幾察也其氏掌設弧張為阱擗以攻猛獸以靈鼓歐之若得

其獸則獻其皮革齒須備

釋曰弧張機弩置罟之屬阱坑坎也擗機於坎也靈鼓六面鼓也鼓之使驚阱擗也須者額之須備者謂爪也攻猛獸者既為民除害又資其物以利用也

庶氏掌除毒蠱以攻說禴之嘉草攻之凡歐蠱則令

之比之

蠱音古
禴音潰

釋曰蠱毒之病人非一種而下士一人者掌其方書治療之灋也以攻說禴之者蠱有神用巫醫祝禁之也今百粵山谷之間有蠱有神蠱豈自古有

之歟嘉草攻之者用藥草燻之草有善制其毒者其草未聞凡能歐蠱者隨其方土所宜各有能者病則用之而庶氏比其優劣焉

宄氏掌攻螫獸各以其物火之以時獻其珍異皮革釋曰螫獸能罷之屬有絕倫之力冬則宄處乃可攻也將攻之必先燒其所食之物以誘出之而後可得既得之則獻其珍異皮革如瓜牙可備用皮革可製也

翬氏掌攻猛鳥各以其物為媒而拮之以時獻其羽

翮拮居綺反
翮戶革反

釋曰猛鳥鷹隼之屬取猛鳥者或以鳩鴿誘而致之或以匹類媒而招之鳥來下則拮之謂係其足也既獲之則獻其羽翮以共用也王介甫曰致猛獸以除人物之害焉非利其羽翮而已孟子曰鳥獸之害人者消然後人得平土而居之則正以除為主也

柞氏掌攻草木及林麓夏日至令刊陽木而火之冬日至今剥陰木而水之若欲其化也則春秋變其水火凡攻木者掌其政令

釋曰攻治也積木曰林山足曰麓草木所生林麓

之地皆可宅居民稼穡故柞氏掌攻治之政刊剝
互言耳皆謂斫去其皮也凡木生於山南爲陽生
於山北爲陰夏日至陽之日也陽木以至陽之日
刊而火之則不勝陽而死且不肄焉冬日至陰之
日也陰木以至陰之日剝而水之則不勝其陰而
死且不肄焉化欲使化而爲土也變其水火者陰
木至春又從而火之陽木至秋又從而水之則其
孽薄於陰陽相殄之氣化而爲土矣政令即刊剝
之期水火之變也

雜氏掌殺草春始生而萌之夏日至而夷之秋繩而
芟之冬日至而耜之若欲其化也則以水火變之掌
凡殺草之政令

釋曰柞氏攻木雜氏殺草皆所以爲田也春如萌
芽則以鎡基鋤其生而夷之夏漸長茂則以鈎鎌
迫地而刈之含實曰繩秋芟其繩則實不成矣冬
則以耜去其根使不復生也欲其化化爲也以火
燒其所芟夷之草已而水之則其土亦和美矣月
令季夏燒薙行水利以殺草是也

按舊本雜氏之下有若蒺氏翦氏與庶氏相同亦
友氏蠲氏壺涿氏庭氏六官立名詭異載事不經
後人附麗明甚先儒疑周禮者在此今
出之置考功記之後使聖經明潔焉

銜枚氏掌司囂國之大祭祀令禁無囂軍旅田役令銜枚禁詔呼歎鳴於國中者行歌哭於國中之道者

囂五羔反詔音叫

釋曰掌司囂者司察在朝者言語之喧嘩也大祭祀貴嚴肅故令禁止無謹囂軍旅田役令銜枚枚如箸為縵以結於項不使之言語有聲也車攻詩曰之子于征有聞無聲言靜肅也聲大而急曰詔聲高而緩曰呼聲嗟而怨曰嘆聲悲而傷曰鳴禁詔呼嘆鳴及行歌哭者為其惑眾相感動也

伊耆氏掌國之大祭祀共其杖咸軍旅授有爵者杖

共王之齒杖

咸音函

釋曰咸函也所以藏杖也老臣雖杖於朝事鬼神尚敬去之有司以此函藏之既事乃授之軍旅授杖有爵者尊其爵故授杖以指揮兵眾不必老焉共王之齒杖者王以齒而賜老臣之杖伊耆共之也鄭氏曰王之所以賜老者之杖王制曰五十杖於家六十杖於鄉七十杖於國八十杖於朝○按此二官銜枚禁止言語宜在秋官也伊耆所以優老也何以在秋官蓋秋者陽氣自消之時五十以後向於老矣此伊耆氏所以在此也

大行人掌大賓之禮及大客之儀以親諸侯春朝諸侯而圖天下之事秋覲以比邦國之功夏宗以陳天下之謨冬遇以協諸侯之慮時會以發四方之禁殷同以施天下之政時聘以結諸侯之好殷覲以除邦國之慝間問以諭諸侯之志歸賑以交諸侯之福賀慶以贊諸侯之喜致禴以補諸侯之裁

比毗志反好好呼報反覲通

弔反間去聲賑上忍反禴如字

釋曰大賓謂六服之群辟大客謂列國之孤卿禮以本言儀以文言對舉之互文也春見曰朝則圖其事之可否秋見曰覲則比其功之高下夏見曰

宗則陳其謨之是非冬見曰遇則合其慮之異同時見曰會非朝覲之常期而相見也則徵其師旅以施九伐之灋殷見曰同當十二歲王不巡狩而諸侯皆來朝也則考其制度亦如方岳之禮既朝王命為壇於國外合諸侯而命政事焉黃氏曰諸侯平時無事王者之使相繼於道德意志慮道之使知度量灋則諭之使同好惡已於心用捨已一於事及其入王則又會而圖之收衆見以為王明合衆善以為王道以四海為一家中國為一人蓋如此耳時聘殷覲此二者王見諸侯之使臣也諸

侯使大夫來聘親以禮見之禮而遣之所以結其
恩好也諸侯使卿來覲天子天子以禮見之命以
政禁之事所以除其惡行慝猶惡也間問歸賑賀
慶致禴此四者王者使臣於諸侯之禮也間問者
間歲一問諸侯謂存省之屬諭諸侯之志者諭言
語諭書名其類也賑所以交神之福以賑歸之則
與諸侯共其福也諸侯有喜也賀慶以贊之所以
與之同其樂諸侯有災也致禴以補之所以與之
同其憂也王氏曰朝覲宗遇會同六者諸侯致勤
於王者也間問歸賑賀慶致禴四者王致愛於諸
侯者也諸侯以禮致其憂王者以仁致其愛尊卑
之意通內外之誠達尚何疑猜間貳之爲患哉所
以親諸侯者在是矣

以九儀辨諸侯之命等諸臣之爵以同邦國之禮而
待其賓客上公之禮執桓圭九寸纁籍九寸冕服九
章建常九旒樊纓九就貳車九乘介九人禮九牢其
朝位賓主之間九十步立當車軹擯者五人廟中將
幣三享王禮再裸而酢饗禮九獻食禮九舉出入五
積三問三勞諸侯之禮執信圭七寸纁籍七寸冕服
七章建常七旒樊纓七就貳車七乘介七人禮七牢

朝位賓主之間七十步立當前疾擯者四人廟中將幣三享王禮壹裸而酢饗禮七獻食禮七舉出入四積再問再勞諸伯執躬圭其他皆如諸侯之禮諸子執穀璧五寸纁籍五寸冕服五章建常五旂樊纓五就貳車五乘介五人禮五牢朝位賓主之間五十步立當車衡擯者三人廟中將幣三享王禮壹裸不酢饗禮五獻食禮五舉出入三積一問一勞諸男執蒲璧其他皆如諸子之禮

纁音藻軹之比反食音嗣積子賜反勞七報反信音中

釋曰九儀謂命者五公侯伯子男爵者四孤卿大夫士也凡諸侯來朝之禮曰圭璧執之以見王者

也曰纁籍所以籍王者也曰冕服著冕所服之衣也曰常所建之旌旗也旂其屬縵垂者也樊纓馬飾也以屬飾之每一處五采備焉就成貳車副車也無飾者也介輔已行禮者也禮大禮饗餼也三牲備為一牢擯所使傳命相禮者也朝位謂大門外賓出車及王車出迎所立處王始立大門內交擯三辭乃乘車而迎之軹轂末也廟中將幣謂行朝禮訖乃行三享在受命祖之廟也三享三獻也皆束帛加璧庭實王禮王以鬱鬯禮賓也鬱人和鬱鬯實葵而陳之使宗伯攝酌圭瓚而裸王既拜

送爵又攝酌璋瓚而裸后又拜送爵是謂再裸賓乃酢王也九獻者王酌獻賓賓酢凡九也九舉者食禮之時九舉牲體而食畢出入五積謂在路供賓來去皆五積每積有牢禮芻薪米禾問不恙也勞苦倦乏也凡此數者諸侯之禮皆同而有隆殺之等上公九命故其禮以九爲節侯伯七命故其禮以七爲節子男五命故其禮以五爲節前疾者轅曲中在軹之前衡之後侯伯一裸而酢者賓酢王而已后不裸也子男一裸不酢者則有禮無報卑不敢當焉七獻五獻則主於飲故以獻爲節七

舉五舉主於食故以舉爲節此所謂名位不同禮亦異數也

凡大國之孤執皮帛以繼小國之君出入三積不問一勞朝位當車前不交擯廟中無相以酒禮之其他皆眡小國之君凡諸侯之卿其禮各下其君二等以下及其大夫士皆如之

釋曰此以君命來聘者也。大國之孤未誓於天子奉君命而朝則以皮帛爲贄次於子男之後不交擯不使介傳辭交於王之擯親自對擯也。廟中無相謂介皆入門西上而立不前相禮也以酒禮之

酒謂齊酒也和之不用鬱鬯耳卿各下其君二等若公之卿以七侯伯之卿以五子男之卿以三大夫又各下卿二等士又降於大夫一等也

邦畿方千里其外方五百里謂之侯服歲一見其貢祀物又其外方五百里謂之甸服二歲一見其貢嬪物又其外方五百里謂之男服三歲一見其貢器物又其外方五百里謂之采服四歲一見其貢服物又其外方五百里謂之衛服五歲一見其貢材物又其外方五百里謂之要服六歲一見其貢貨物九州之外謂之蕃國世一見各以其所貴寶為摯

釋曰諸侯之國其道路有遠近之殊故朝見有疏數之節至其所貢物亦因其土地之宜未必某國出某物而限之也此因朝而貢乃執摯見王之禮非九貢之物也小行人春入貢是九貢之物歲之常貢也大行人之言亦舉其槩耳父子相繼謂之世蕃國無朝見之期父死子繼及嗣王即位然後一來見其所貴寶謂其國所產貴重之物則以為摯如島夷之卉服西戎之織皮是也王氏曰自侯服歲一見至要服六歲一見以遠近為疏數之節也自要服以上所貢有常物而蕃國則各以所貴

實爲擊者詳於治內而畧於治外也郊特牲曰旅幣無方所以別土地之宜而節遠邇之期也土地之宜在物而遠邇之期在人然則六服六歲之差六貢六物之異正所謂遠邇之期土地之宜乎成王訓迪厥官曰六年五服一朝以侯甸男采衛而言也而行人於六服之見則及於要服者其治制禮之時爲已備矣其近中國之夷狄非特承德又能入貢來見焉則致禮以致太平者此其極也王之所以撫邦國諸侯者歲徧存三歲徧覲五歲徧省七歲屬象胥諭言語協辭命九歲屬瞽史諭書名

聽聲音十有一歲達瑞節同度量成牢禮同數器脩

灋則十有二歲王巡狩殷國

胥讀爲瞽

釋曰撫猶安也上諸侯朝天子之事此天子撫諸侯之事一歲者巡守之明年爲始也存者問其安否覲視其治效省察其風化也皆王遣使於諸侯之禮所謂問問也南方爲象通言語之官也胥有才智者辭命辭之命也故七歲則以屬象胥通五方之言語達九等之辭命瞽樂師也史大史小史也故九歲則屬瞽史達六書之名所以同其文也聽六律之音所以和其聲也瑞六瑞節六節也

度丈尺也量區金也牢禮若掌客之所職數器銓
 衡也灋八灋則八劑十有一歲王將巡狩之時則
 列國之瑞節度量牢禮數器灋則有不一者大行
 人從而達同成脩以齊之為明年巡狩考制度張
 本也十二歲王巡守則諸侯各朝于方岳考禮正
 刑大明黜陟王不巡守則會諸侯而殷見此皆所
 以撫邦國也

凡諸侯之王事辨其位正其等協其禮賓而見之若
 有大喪則詔相諸侯之禮若有四方之大事則受其
 幣聽其辭凡諸侯之邦交歲相問也殷相聘也世相

朝也

釋曰王事諸侯朝王之事辨其位謂九十七十五
 十步之位正其等謂冕服旌旗貳車之類皆有等
 級禮饗餼饗食之禮以此禮等賓敬而見之也大
 喪諸侯入弔臨者齊斬之服僻踊之節必教告而
 相道之列國被寇戎而來告者受其贄幣而聽其
 告急之辭以達于王也凡諸侯之邦交謂鄰國之
 往來也小以事大夫以此小粲然之文謹然之恩
 以相愛相接也各有䟽數焉小聘曰問殷中也父
 死子立曰世凡君即位大國朝焉小國聘焉皆所

以習禮考儀正刑一德以尊天子也若問聘則遣
臣而已
呂氏曰聘義曰天子制諸侯比年小聘三年大聘
相厲以禮使者聘而誤上君弗親饗也所以愧厲
之也夫上下不交則天下無邦人道所以不能羣
也故先王之馭諸侯必使相交以脩其好必使相
敬以全其交多爲之升降之文酬酢之節蓋以養
其德意使之安於是而不憚也故不安於偷盜而
安於行禮不耻於相下而耻於無禮則忿爭之心
暴慢之氣無所從而作此天下之亂所以止之於

未萌也天子以是養諸侯諸侯以是養其士大夫
上下交相養此兵所以不用天下所以平也

小行人掌邦國賓客之禮籍以待四方之使者令諸
侯春入貢秋獻功王親受之各以其國之籍禮之凡
諸侯入王則逆勞于畿及郊勞胝館將幣爲承而擯
釋曰禮籍所載諸侯名位尊卑禮節隆殺之書也
四方諸侯之使臣來按籍以待之貢天子所食列
國之貢是歲之常大國半次國三之一小國四之
一是也春而入焉功考績之功也若今計文書斷
於九月其舊灋也曰獻者圖於春而比於秋也王

親受之國之所重在此也。入王入朝于王也。諸侯來朝其未至則有迎勞郊勞之禮。及其既至則有致館將幣之儀。皆王遣公卿以示誠意之厚。小行人但為承擯耳。承次擯也。

凡四方之使者大賓則擯小客則受其幣而聽其辭。使適四方協九儀賓客之禮。朝覲宗遇會同君之禮也。存覘省聘問臣之禮也。

釋曰大客則擯者擯而見之王使得自言也。小客則受幣而聽辭者受其贄幣入以告王所為來之事也。適之也。王撫存四方遣使則受灋於小行人。

使協九儀賓客之禮。朝覲宗遇會同君禮者乃臣事君之禮。存覘省聘問五者王撫臣之禮。賓五客四謂之九儀。

達天下之六節。山國用虎節。土國用人節。澤國用龍節。皆以金為之。道路用旌節。門關用符節。都鄙用管節。皆以竹為之。

釋曰達之者使之四方皆齊灋式以齊等之也。龍虎人皆以金為之。金取不變之義也。旌符管皆以竹為之。竹有自然之節故也。不言璽節則貨賄非小行人所與。不言玉節角節則守邦國都鄙行人。

非所達邦節先門關後道路則以自內達外言之
天下之節先道路後門關則自外達內言之也

成六瑞王用璜圭公用桓圭侯用信圭伯用躬圭子
用穀璧男用蒲璧合六幣圭以馬璋以皮璧以帛琮
以錦琥以繡璜以黼此六物者以和諸侯之好故

釋曰成平也瑞信也皆朝見所執以爲信合同也

六幣者諸侯所用以享也諸侯之致享凶盡其誠
心外備其禮物而行人所以合六幣也五等諸侯
享天子用璧享后用琮其大各如其瑞皆有庭寶
以馬若皮皮虎豹皮也用圭璋者二王之後也二

上後尊故享用圭璋而特之薛氏曰言合者兩兩
相配有配合之義也圭東方也以象陽之生物馬
陽類也乾之所爲故合以馬璋章也文明之方所
用皮有文也故合璋以皮璧象天天事實故合璧
以帛琮象地地事文故合琮以錦琥爲虎形西方
也萬寶所成繡則五采之全故合以繡半璧曰璜
北方所用也陰陽之辨莫斷於此故合以黼以白
爲黑謂之黼故也以其通情而來則謂之好以其
因事而來則謂之故行人爲之合六幣焉所以和
其好故不使之乖也○劉氏曰九儀既正乃達六

節以爲門關之符乃成六瑞以通朝見之信乃合六幣以致享摯之誠然後禮樂行焉燕饗舉焉諸侯之好故出焉

若國札喪則令賻補之若國凶荒則令賙委之若國師役則令橐禮之若國有福事則令慶賀之若國有禍哉則令哀吊之凡此五物者治其事故

釋曰天子之於諸侯同其憂樂者也此賻補賙委橐禮哀弔慶賀之禮所以掌於行人以治其事故也病曰札死曰喪則在所賻補謂以禮傳之爲賻助其不足爲補也穀不熟曰凶凶甚而爲荒凶荒

則在所賙委以利周之謂之賙以聚與之謂之委也大宗伯以喪禮哀死亡荒禮哀凶札是也有兵寇謂之師會衆以興功謂之役師役則在所橐禮犒其勞則謂之犒會衆財以與之則謂之禮大宗伯以禮禮哀圍敗以恤禮哀寇亂是也福事則在所慶賀大宗伯以賀慶之禮親異姓之國是也禍裁則在所哀弔大宗伯以弔禮哀禍哉是也

及其萬民之利害爲一書其禮俗政事教治刑禁之逆順爲一書其悖逆暴亂作慝猶犯令者爲一書其札喪凶荒厄貧爲一書其康樂和親安平爲一書凡

此五物者每國辨異之以反命于王以周知天下之故

釋曰慝惡也猶圖也行人之適四方必采其風俗
美惡條錄爲書以報上焉所以廣天子之視聽詩
皇華所謂諏謀咨詢即此是也猶後世遣直指使
者巡行天下採察風俗政治美惡以報於朝以行
黜陟也諸侯之政孰有利於民孰有害於民者錄
爲一書則興除之宜在是矣禮俗也政事也教治
也刑禁也諸侯所行有順逆從違錄爲一書則慶
讓之道在是矣悖逆也暴亂也作慝也犯令也諸

侯罪惡有若是者錄爲一書則征誅之舉在是矣
札喪凶荒厄貧侯國有是者錄爲一書則王朝所
當卹者在是矣康樂和親安平侯國有如是者錄
爲一書則王朝所當褒賞者在是矣凡此五事者
每國辨異之以爲使歸反命之獻焉則王者所以
周知天下之故者此也王氏曰聖人以天下爲度
而休戚與之同以百姓爲心而憂樂與之共則天
下之故可以不周知乎然四方之遠事物之變無
窮而王之耳目所不及聽採所難明非行人之官
巡行而辨異之有不能徧究而悉舉故爲之書具

五物以述其事以反命于王則先王所以同四海於一堂之上者不可謂知要乎

司儀掌九儀之賓客擯相之禮以詔儀容辭令揖讓之節將合諸侯則令爲壇三成宮旁一門詔王儀南鄉見諸侯土揖庶姓時揖異姓天揖同姓及其擯之各以其禮公於上等侯伯於中等子男於下等其將幣亦如之王燕則諸侯毛

釋曰出接賓曰擯入贊禮曰相以詔者以禮告土儀容所以相接辭令所以相與揖遜所以相欽會諸侯謂有事而會也爲壇於國外以命事三成三

重也宮爲壇土以爲墻其門以棘爲之觀禮云諸侯覲於天子爲官方三百步四門壇十有二尋深四尺蓋壇土爲壇壇外爲宮每旁一門則四門矣加方明於壇上而祀焉蓋聖人身爲天地之主尊爲萬國之君雖能使之四時來朝不敢當其獨尊于也故其朝于國中則帥之以奉宗廟祭祀也其會于郊外則帥之以拜日月山川也所以教尊尊也詔王儀謂王旣祀方明諸侯上介皆奉其君之旂置于宮乃詔王升壇諸侯就其旂而立朝位王南鄉向明以聽天下也土揖則推手小下之庶

姓無親者也時揖則平手揖之異姓則王之姻親也天揖舉手揖之同姓王之宗族也及其擯之謂擯諸侯以前王也各以其爵之尊卑爲隆殺壇有三重擯公於第一重侯伯於第二重子男於第三重其將幣以享亦分三等其行裸將之禮亦然所謂上公再裸而酢是也朝享畢而燕則諸侯毛諸老者在上也老者二毛故曰毛朝事尊尊尚爵燕則親親尚齒貴貴老老之義也貴貴者禮也老老者仁也賢賢者義也爵齒德同爲天下之達尊也凡諸公相爲賓主國五積三問皆三辭拜受皆旅擯

再勞三辭三揖登拜受拜送主君郊勞交擯三辭逆拜辱三揖三辭拜受車送三還再拜致館亦如之致殮如致積之禮及將幣交擯三辭車逆拜辱賓車進答拜三揖三讓每門止一相及廟唯上相入賓三揖三讓登再拜授幣賓拜送幣每事如初賓亦如之及出車送三請三進再拜賓三還三辭告辟致饗餼還圭饗食致贈郊送皆如將幣之儀賓之拜禮拜饗餼拜饗食賓繼主君皆如主國之禮諸侯諸伯諸子諸男之相爲賓也各以其禮相待也如諸公之儀釋曰行人所掌諸侯朝王王撫諸侯之禮司儀所

掌諸侯相賓及臣交聘之禮諸公相爲賓謂相朝也賓所停止則積問闕則問行道則勞皆使卿大夫致之主國始聞賓入境於其止宿則有五積以其間闕則有三問賓三辭之若不敢當也拜而受之敬主君之命也九擯陳之而已矣無所事於交擯也再勞者以道途之苦故遣使再勞也三揖者謂入門當曲當碑也拜遂受其勞拜送送其使也賓至于郊則主君出郊而勞於是有交擯之禮賓主各陳九介使之傳辭也三辭不獲賓乃乘車出舍門而迎之既見則下拜迎謝其屈辱而來也於

是三揖以致恭三辭以致謙然後升堂拜受其勞也主君之去賓又出車以送之主君三還辭之賓乃再拜送之也將幣賓致幣以享主君也車逆拜辱主君乘車出迎而拜謝其來辱也車進答拜賓乘車前進而答拜其迎已也相主之擯賓之介也及廟唯上相入以詔禮也授幣之授當作受主君拜受幣尊其所享也賓拜送幣致敬於所享也朝享而出主君諸賓就車每一請則車一進欲遠送之也三還三辭謂主君一請者賓亦一還一辭三辭不獲則告避也熟食曰飧生物曰餼還車享畢

而歸其玉也致贈賓去而贈以財也郊送謂主君送賓至于郊也郊送之時主君親至賓為主而主為賓矣故擯之之禮與主國同侯伯子男之相為賓客視其命數為禮之隆殺其行禮之節亦同於諸公

諸公之臣相為國客則三積皆三辭拜受及大夫郊勞旅擯三辭拜辱三讓登聽命下拜登受賓使者如初之儀及退拜送至館如初之儀及將幣旅擯三辭拜送客辟三揖每門止一相及廟唯君相入三讓客登拜客三辟授幣下出每事如初之儀及禮私面私

獻皆再拜稽首君答拜出及中門之外問君客再拜對君拜客辟而對君問大夫客對君勞客客再拜稽首君答拜客趨辟致饗餼如勞之禮饗食還圭如將幣之儀君館客客辟介受命遂送客從拜辱於朝明日客拜禮賜遂行如入之積凡侯伯子男之臣以其國之爵相為客而相禮其儀亦如之

賓使者當為擯從力用反

釋曰此諸公遣其卿聘於鄰國之禮也賓至境則主國遣使致積賓至郊則主君遣大夫迎勞賓三讓而升堂聽使者傳命畢然後下堂而拜命升堂而受幣也主之勞賓用束錦賓既至則遣卿致館

其辭讓拜受皆如郊勞之禮三辭者辭主君以客禮待已也主君拜迎而客辟者不敢當主君拜也及廟唯君相入者客乃臣也故其相不敢入也客登堂主君拜其至客三辟者逡巡而三退也賓既卒聘主君以禮禮之賓奉束帛請覲所謂私面私獻也問君問其君之無恙也再拜而對者敬所尊也問大夫問其大夫之無恙也對而不拜者已同列也勞客者勞其行道之勤也再拜稽首者謝主君勞已也君館客者以賓將去故就館省之也辟介受命者賓不敢當主君之命而辟則前而受命也遂送者主君拜以送客也禮賜謂乘禽君之加惠也如入之積出亦三積也侯伯子男之臣謂卿大夫士各以其爵之尊卑而為禮之隆殺其儀同也

凡四方之賓客禮儀辭命餼牢賜獻以二等從其爵而上下之凡賓客送逆同禮凡諸侯之交各稱其邦而為之幣以其幣為之禮凡行人之儀不朝不夕不正其主面亦不肯客

釋曰禮儀見於容貌辭命見於問答餼牢禮之常也賜獻禮之加也以二等後其爵而上下之降殺

以兩也送逆同禮者來則逆之有問勞之儀去則送之賻贈之禮凡列國往來之禮以邦之大小而為幣之隆殺以幣之隆殺為禮之厚薄日出為朝日入為夕主西南也客北面也為行人而擯相者視賓主所向隨機旋轉不正面主不背客也○王氏曰邦國之君臣相為賓客先王設官掌其禮問勞贈送物為之數拜揖辭受事為之節此邦國之君臣所以相親也觀春秋之時一言之不酬一揖之不中而兩國為之暴兵則周官圖民禍患豈不預哉

行夫掌邦國傳遞之小事媿惡而無禮者凡其使也必以旌節雖道有難而不時必達居於其國則掌行人之勞辱事焉使則介之難去聲馬如字

釋曰傳遞若今時乘傳騎驛而使者也小事小禮也媿福慶也惡凶荒也無禮小使而無大禮也謂諸侯小慶吊也必以旌節為國使而行雖小事必以旌節為信也道有難謂在途有疾或他故不以時至然必達之於所往之國王命不敢廢也居於諸侯之國則凡行人煩勞汗辱之事皆掌之焉若止行人為使則為之介以行夫為行人之屬役也

環人掌送逆邦國之通賓客以路節達諸四方舍則授館令聚橐有任噐則令環之凡門關無幾送逆及疆

釋曰通賓客以常事往來者也路節謂旌節館謂侯館令野廬氏也有任用之噐則環而守之凡門關無幾者謂賓客出入環人以路節達之或曰環人自以路節出入故門關不得而幾也疆王畿四方之界賓客來則逆之去則送之至疆而止不越也

象胥掌蠻夷閩貉戎狄之國使掌傳王之言而諭說

焉以和親之若以時入賓則協其禮與其辭言傳之

凡其出入送逆之禮節幣帛辭令而賓相之賓當為

釋由國使謂蕃國之臣來朝聘者傳王言而諭說

者以象胥知四夷言語也如令中譯和之親之使其心歡悅

也入賓謂其君以世一見來朝為賓者不謂之入

主者非王政所加故也夷狄之人其拜揖進退跪

伏之禮不同於中國象胥教之以中國之儀用協

其禮也與其辭言傳之者譯其外國之言辭傳以

告于上也凡其出入迎送之禮節幣帛辭令而擯

相之從來至去皆為之擯而詔侑其禮儀也

凡國之大喪詔相國客之禮儀而正其位凡軍旅會同受國客幣而賓禮之凡作事王之大事諸侯次事卿次事大夫次事上士下事庶子

釋由~~由~~與入賓而遇國之大喪則詔相其哀臨之禮儀而正其坐立之位遇有軍旅會同之事則受其幣而以賓接之凡作事謂作四夷之事也國之大事莫大於戎有戎事於四夷則命諸侯使之敵王愾焉次事則或威讓之令又告之辭施於四夷者則量其事之輕重或以卿或以大夫或以上士也若下事則事之尤小者故以庶子而已○何氏

曰夷狄雖在荒遠然羞愧之心好惡之情亦與中國不殊接之以禮待之以誠則相率而悅服矣不然則執干戈以犯邊境者豈其微哉凡伯不賓而有楚丘之伐駒支有蒞而得與于向之會孰謂夷狄可賤簡耶

掌客掌四方賓客之牢禮餼獻飲食之等數與其政治王合諸侯而享禮則具十有二牢庶具百物備諸侯長十有再獻王巡守殷國則國君膳以牲犢令百官百姓皆具從者三公眡上公之禮卿眡侯伯之禮大夫眡子男之禮士眡諸侯之卿禮庶子一眡其大

周禮全經 卷之十一
夫之禮

釋曰四方之賓客其名位不同故其牢禮餼獻飲食之等數亦異政治王朝之典禮也王合諸侯而行饗食之禮則具十有二牢者以公侯伯子男盡在是故用王禮之數也庶羞百品莫不皆具厚其禮也上公九命作伯者用十二獻者優尊之也王十二年而巡守則列國皆朝所過之國供王之膳以牲則犢貴其誠也犢繭栗之犢與祭天同共王之百官則具百牲以多爲貴也王之從臣其三公之禮比於上公其卿之禮比於侯伯其大夫之禮

比於子男士之禮比於諸侯之卿庶子之禮比於諸侯之大夫隆殺之等各有所眡焉

凡諸侯之禮上公五積皆眡殮牽三問皆脩羣介行人宰史皆有牢殮五牢食四十簋十豆四十鉶四十有二壺四十鼎簋十有二牲三十有六皆陳饗餼九牢其死牢如殮之陳牽四牢米百有二十筥醢醢百有二十甕車皆陳車米眡生牢牢十車車乘有五數車禾眡死牢牢十車車三秬芻薪倍禾皆陳乘禽日九十雙殷膳太牢以及歸三饗三食三燕若弗酌則以幣致之凡介行人宰史皆有殮饗餼以其爵等爲

之牢禮之陳數唯上介有禽獻夫人致禮八壺八豆八簋膳太牢致饗大牢食大牢卿皆見以羔膳大牢

牲當作腥車皆陳之車字
衍文藪素口反耗音姤

釋曰此以下皆諸侯相朝主國待賓之禮也。眡殮牽所共如殮之數牽牲以往不殺也。三問皆脩於其始至相問問闕則有脩焉。脩者脯之加薑桂者也。群介行人宰史皆公所從行者也。致問之始亦有牢者尊其君以及其臣也。簋所以盛稻梁。簋所以盛黍稷。豆所以盛菹醢。鉶羹器。壺酒器。鼎烹飪之器。牲當作腥。謂腥鼎也。饗餼既相見致大禮也。

死牢已殺者也。牽則生牢也。十斗為斛。十六斗為藪。十藪為秉。一秉十六斛。禾四秉曰莒。十莒曰稷。十稷曰秬。乘禽雉鴈之屬。自賓始至以及歸饗燕食皆三。君有故不親饗。燕食則遣大夫以酬幣。致君饗禮以侑幣。致其食禮所以將意也。上介有禽獻以其在諸侯之臣為尊。故優異之也。夫人致禮助君養賓也。卿皆見者見于賓也。膳大牢亦所以助君養賓也。

侯伯四積皆眡殮。牽再問皆脩。殮四牢。食三十有二。簋八。豆三十有二。鉶二十有八。壺三十有二。鼎簋十

有二腥二十有七皆陳饗餼七牢其死牢如殮之陳
牽三牢米百筥醢醢百甕皆陳米三十車禾四十車
芻薪倍禾皆陳乘禽日七十雙殷膳大牢三饗再食
再燕凡介行人宰史皆有殮饗餼以其爵等爲之禮
唯上介有禽獻夫人致禮八壺八豆八簋膳大牢致
饗大牢卿皆見以羔膳特牛子男三積皆眡殮牽一
問以脩殮三牢食二十有四簋六豆二十有四釶十
有八壺二十有四鼎簋十有二牲十有八皆陳饗餼
五牢其死牢如殮之陳牽二牢米八十筥醢醢八十
甕皆陳米二十車禾三十車芻薪倍禾皆陳乘禽日
五十雙一饗一食一燕凡介行人宰史皆有殮饗餼
以其爵等爲之禮唯上介有禽獻夫人致禮六壺六
豆六簋膳眡致饗親見卿皆膳特牛凡諸侯之卿大
夫士爲國客則如其介之禮以待之

釋曰侯伯之禮殺於上公子男之禮殺於侯伯夫
人致禮侯伯與上公同不言食大牢則殺於公也
致禮於子男殺於侯伯特言膳眡致饗者夫人致
膳於小國之君以致饗之禮亦不復饗也卿之膳
或用大牢或用特牛亦禮之殺也子男獨言親見
者大國之卿於小國之君有不造館見者見之乃

致膳耳爲國客謂卿大夫士特來聘問者待之之禮亦如凡介有饗殮餼以其爵等爲牢禮之陳數同科也

黃氏曰先王待諸侯何其至也未至也致積始至也致殮及其朝饗之後又致饗餼之大禮食之而弗愛豕交之也則有問勞逆送之示其勤愛而弗敬是以獸畜之也則有辭受拜揖之示其恭然恭敬而無實君子不可以虛拘也又况其愛之乎拜揖辭讓恭之之文也有饗焉則盡其恭之之實問勞送逆愛之之文也有燕焉則盡其愛之之實其

樂無算取其歡而已其爵無筭取其醉而已取脯以降奏陔以出諸侯心平而氣和相與一德以尊其上大者比其小小者事其大相朝之君相問之使旌節繼道何以致之先王爲之朝禮而貴貴之教寓焉爲之燕禮而老老之教寓焉爲之饗禮設几而不倚所以訓其恭爵盈而不飲所以訓其儉是其所以致之之道也

凡禮賓客國新殺禮凶荒殺禮札喪殺禮禍裁殺禮在野在外殺禮凡賓客死致禮以喪用賓客有喪唯芻稍之受遭主國之喪不受饗食受牲禮

釋曰國新新建國也荒凶無年也禍哉新有兵寇水火也札喪民疫厲也在野謂野外忽遽禮物不可卒備在外禍亂出避也凡此數者禮從省約不求豐備也朝聘之賓死則主國爲之具而殯之喪用饋奠之物也賓在主國聞親之喪則饗食之禮不敢受而受芻稍以給人馬者不可辭也牲當作腥主國有喪不受其熟食而受其生物者有喪不忍烹煎也

掌訝掌邦國之等籍以待賓客若將有國賓客至則戒官修委積與士通賓于疆爲前驅而入及宿則令聚橐及委則致積至于國賓入館次于舍門外待事于客及將幣爲前驅至于朝詔其位入復及退亦如之

釋曰等籍者九儀差數之籍也有賓客則以其籍數而爲隆殺之節焉戒官脩委積若牛人共積牛羊人共積羊倉人共道路之穀積委人共積委之芻薪戒之使蚤正素備以給賓客之用也士訝士也聚橐令野廬氏也及委則令致積以王命致于賓也賓既就館則次于舍門之外待事于客通其所求也前驅道之以如朝也詔其位告賓以位處

也入復者入告王以客至也及退亦復于王所謂
賓不顧矣是也

凡賓客之治令訝訝治之凡從者出則使人道之及
歸送亦如之凡賓客諸侯有卿訝卿有大夫訝大夫
有士訝士皆有訝凡訝者賓客至而往詔相其事而
掌其治令

釋曰賓客之治謂欲理國事也以告乎訝訝謂如
朝而理之從者凡介以下也人其徒屬也使道賓
客之從者營護之也送亦如之送至於境如其前
驅聚橈待事之屬賓客之爵命不同王所使訝賓

之臣以爵命皆卑一秩卑而迎尊也賓客方至則
掌訝往而詔相其事治令逆送賓客之政令也

掌交掌以節與幣巡邦國之諸侯及其萬民之所聚
者道王之德意志慮使咸知王之好惡辟行之使和
諸侯之好達萬民之說掌邦國之通事而結其交好
以諭九稅之利九禮之親九牧之維九禁之難九伐
之威

辟音避

釋曰節以爲信幣以爲禮持節與幣巡行諸侯及
萬民聚居之處道說王者德之所存意之所發志
之所之慮之所定使臣民皆知王之所好者德善

而行之所惡者邪惡而避之。又使王知諸侯之所好，達萬民之所悅，則上下之情莫不通矣。通事謂朝覲聘問也，諭告曉也。九稅之利必有九職共貢，賦以盡臣職之利也。九禮之親必結九儀之好，以相維持也。九禁之難必知九灋之禁，則免於患難也。九伐之威必畏九伐之灋，則免於刑戮也。皆其職通上之情，使其下之必遵，成下之義，使其上之必庇者也。王介甫曰：九稅之利使知樹執，九禮之親使知分守，九牧之維使知聽令，九禁之難使知避禁，九伐之威使知免兵於無事之時，使人巡邦國而諭之，折衝萌多矣。不知出此而恃威讓文告征伐之施焉，則非所謂圖難於其易，為大於其細也。○愚謂九稅九禮九牧九禁，其目皆見大小司馬之職，掌與九伐同，而今亡矣。

掌察

關

監掌督察邦國之事者，諸侯有廢灋犯令者，則告于王而詰之。

掌貨賄

關

諸侯之朝聘，有時幣帛之往來，有數，若非朝聘之期，以貨賄私交者，王灋所禁也。

朝大夫掌都家之國治，日朝以聽國事故，以告其君。長國有政令，則令其朝大夫，凡都家之治於國者，必

因其朝大夫然後聽之唯大事弗因凡都家之治有不及者則誅其朝大夫在軍旅者則誅其有司

釋曰掌都家之國治謂公卿王子弟之都大夫之家凡有治於國則朝大夫掌之也日朝者日日在朝以聽受國之事故也所作謂之事所遭謂之故君謂都家之君長謂都家之吏王國之政令當行於都家者朝大夫聽而受之以告其君長而行之凡都家之治有當治於王國者必因朝大夫以達於國若事之大者則其君長當自稟命不可因朝大夫也都家之治有不及以朝大夫弗達之故則

罪在所誅也在軍旅則大夫弗預焉都家司馬弗達之故也則誅其有司都家司馬也先王制朝大夫之官使都家之治因之以達於國使國之事故因之以告於都家則下之事無不上聞上之政無不下達則自國中至數百里之遠又安有壅遏蔽塞之患哉

都則

闕

都則掌都家之八則者也
也 太宰以八則治都鄙

也又幸以八似欲時時
林頃掌時末多人頃皆
洛頤

寒之患若
木下

國之

夫

對

果

果

果



